

Le texte donné ici est celui de l'édition faite à Francfort en 1578, que nous avons collationnée avec celui de l'édition de 1754, chez Jean le Mair.

Il est à noter que cette oeuvre fut l'objet d'une longue préface de Philippe Melancton :

CLARISSIMO VIRO
MATTHAEO DELIO, RECTO-
RI SCHOLÆ HAMBVRGEN-
sis, Philippus Melancton
S. D.

DE ARTE IOCANDI

LIBRI III. SCRIPTI CARMINE A MATTHEO DELIO HAMBURGENSE, MATTHAEI F.

DE ARTE JOCANDI, LIBER PRIMUS.

J_1	v.1	Si quis in hac artem non noverit urbe jocandi,
	2	me legat, et lepidos discat amare jocos.
	3	Arte palaestritis veniunt in corpora vires,
	4	longaque non forti mittitur hasta manu.
	5	Arte (quod ipsa prius vetuit natura creatrix)
	6	currit in aequoreis picta carina vadis.
	7	Haec nisi perpoliat rudis est natura, decusque
	8	amittens, subito degenerare potest,
	9	laude quidem dignos (quis enim neget) esse fatemur,
	10	te quibus erudiit docta Minerva jocos.
	11	Et quos ingenii felix tibi dictat acumen,
	12	pectoraque Idaliis candidiora rosis.

13 Dispereant arti tribuentes omnia, qui non
14 naturae dotes nobilitate probant.
15 Sed quia quod vere sit ab omni parte beatum,
16 rebus in humanis credimus esse nihil.
17 Arte opus est illis etiam qui dote beati
18 naturae, ingenii dexteritate valent.
19 Adde, quod ut veterem non omnibus ire Corinthum
20 contigit et superas scandere posse domos.
21 Sic certe ingenii non omnibus omnia dona
22 contulit, aut cunctis aequa Minerva fuit,
23 ergone tentandum nihil est, mutanda voluntas,
24 et studii cura est abjicienda tui ?
25 Non ita, sed doctam facilemque ad quaelibet artem
26 consule, non minimum, qui valet arte, valet.
27 Hoc quoque ab arte petes, qua sit ratione jocandum,
28 quaque via incedas me duce certus eris.
29 Ferte pedem Charites, hic aspirate canenti,
30 vos eritis scripti pars quotacumque mei.
31 Convenit hoc vobis studium, salibusque jocosque
32 otia ludendis non inhonesta sequi.
33 Inde quod est ratio, quod regula certa jocandi
34 acceptum vobis quemque referre decet.
35 Vos dictate precor teneris praecepta Camenis,
36 quae passim ingenuo sint adhibenda joco.
37 Sic quoque vester honos nec inani gloria fuco,
38 crescet, et hoc aliquod nomen habebit opus.
39 Nunc bibulo nostram solvemus litore puppem.
40 Et dabimus rapidis flaccida vela Notis.
41 Principio geminos omnes abhibentur ad usus,
42 docta quibus Charitum est lingua probata, joci.
43 Est prior in toto positus sermone loquentis,
44 et bene si spectes latius ille patet.
45 Nam quoties aliquis tibi conveniendus amicus,
46 cui mens alloquio est dura movenda tuo,
47 et quoties placandus erit sermonibus aptis,
48 quem longa offensum reddidit ira tibi :
49 multum verba valent grato condita lepore,
50 his rigidos animos in tua vota trahes.
51 Tum quoties cenam conviva vocatus ad amplam
52 ridiculis verbis exhilarandus erit,
53 quid precor absque jocos (namque hoc te iudice dicam)
54 laetitiae vobis cena peracta dabit ?
55 Multa quidem ridenda dabunt scurrilia dicta,
56 multa inhonesta dabunt, nulla faceta dabunt.
57 Sed placidae Musae convivia casta requirunt,
58 et studii cupidos non nisi honesta decent.
59 Ergo quibus possit salibus tua lingua probari,
60 ex hoc si cupias discere fonte potes.
61 Haec prior in sese, quem dixi, continet usus
62 haec prior utilitas inde petenda tibi est.
63 Alter inest scriptis, et eum sit rarior idem,
64 postremum in versu debet habere locum
65 sive aliquis noto cupiat dare scripta sodali,
66 ornamenta statim, quae cupit, inde capit.
67 Sive foras quisquam sit publica scripta daturus,
68 hinc addet scriptis docta parerga suis.

69 Scripta sed ingenio cujusvis apta parare,
70 non est cujusvis pectoris illud opus.
71 Non datur ad faciles cuivis percurrere Musas,
72 nec leve, Parnassi scandere posse domos.
73 Crebrior est usus, cum scribit amicus amico,
74 et mittit digitis verba notata suis.
75 Littera lecta placet, si tincta leporibus illa est,
76 et placet et pariter corda movere potest.
77 Haec ita, si numeres, duo sunt, quibus omnis inhaeret
78 de quo praecipiet nostra Thalia, jocus.
79 Qua ratione queas sermone facetus haberi,
80 haec nostro cursu prima terenda rota est.
81 Hic brevibus praecepta tibi vulgaria dictis,
82 sed tamen haudquaquam praetereunda dabo,
83 sunt imitanda prius doctorum exempla virorum,
84 qui lepidis salibus nocte dieque student.
85 Et quibus ingenium mite, atque leporibus aptum,
86 compositumque jocis docta Thalia dedit.
87 Istorum cupide tibi consuetudo tenenda est,
88 verbaque sunt animo cuncta notanda tuo.
89 Inde jocosa leges (nec enim confundere tutum est)
90 alterius (moneo) seria classis erunt.
91 Haec ubi sint retinenda, tibi non sponte patebunt
92 omnia, sunt oculis perspicienda tuis.
93 Dissimiles cantor discernit tempore voces,
94 et varios longa judicat arte sonos.
95 Pictor, ut in tabulis vitium cognoscere possit,
96 assequitur studii sedulitate sui.
97 Tu quoque si studii non illius ante pigebit,
98 quam decet, exiguo tempore doctus eris,
99 seria quaeque suo, joca quaelibet ordine pones,
100 nec te iudicium fallet, ut ante, tuum
101 quae tamen ut firma tibi perstet opinio mente,
102 iudicio vulgi ne moveare, cave,
103 abjicienda procul stolidi sententia vulgi,
104 cujus iudiciis maximus error inest.
105 Scilicet hic dicet, studium quid inutile temptas,
106 quaeve supervacui meta laboris erit.
107 Disce quod ignoras, didicisse quod antea notum est,
108 propositum finem non habet iste labor.
109 Iudicio poteris facili discernere verba,
110 verba vel a Pythio si qua profecta deo.
111 Talibus objectis, quae sunt sine pondere rerum,
112 dicere si contra, pauca sed apta velis.
113 Fallere, dic, animo, salibus si verba recepta,
114 aptaque colloquio quaelibet esse putas.
115 Proxima sunt mala verba bonis, obscaena facietis,
116 quam facile est causas error ut inde trahat ?
117 Haec refer, ac ipsum ne te tua culpa docentem
118 arguat, ut possit crimen abesse, vide.
119 Disce quibus verbis jocus haereat optimus, et quo
120 ordine sint istaec distribuenda tibi.
121 Nam tibi non una dici ratione tenendum est,
122 et non unius nominis esse jocos.
123 Est alius pulcher teneroque lepore probatus,
124 est alius turpi garrulitate levis.

125 Major in obscaeno est ubertas, copia major,
126 omniaque hic cornu liberiore fluunt.
127 Litora quot conchas, nitidum quot sidera caelum,
128 quot vagus in sese flumina pontus habet,
129 quot campus flores, tot sunt, quos crimine damnat
130 ars mea, ridiculi garrulitate joci.
131 Semper enim numero pugnant vitiosa, nec illis
132 ordo quidem certus, nec modus ullus adest.
133 Scilicet uberius vitiorum semina crescunt,
134 et variis florent pessima quaeque locis,
135 tu lepidos discerne jocos a turpibus, illos
136 quilibet e doctis, hos rude vulgus amat.
137 Nam sine iudicio turpissima quaelibet illi
138 scommata, et inprimis garrula, lingua placet.
139 Laudibus hunc stolidi variis ad sidera tollunt,
140 pectore qui multum futilitatis habet.
141 Hunc audire iuvat, iuvat observare loquentem,
142 sic neque quod vitium est, laudis honore caret.
143 Et quis enim dubitat ? Laus est meliora probare,
144 omnibus at studio est deteriora sequi.
145 Haec animis hominum numquam quaesita recurrunt,
146 cultoremque suum fertilitate tenent.
147 Nam quis erit, quem non etiam fecere disertum,
148 facundus vitiis quilibet esse potest.
149 Scilicet obscaenus quae dicat multa jocator,
150 sponte fluens illi garrula lingua dabit.
151 Et varios risus facili ratione movebit,
152 aures obtundet garrulitate tuas.
153 Sed quodcumque movet risus sine pondere verbum
154 fallere, si lepidum credis id esse jocum,
155 singula ridemus morionis verba loquentis,
156 quis tamen haec pulchros dixerit esse jocos ?
157 Non est iudicium, non sunt ea signa leporis,
158 nec tantum risus verba iocosa probat.
159 Suavis, et illa novem quae digna est gratia Musis,
160 symbolon est lepidi, qui valet arte, joci.
161 Hoc equidem nullis umquam est mutabile saeculis,
162 at solido semper firmiter aere manet.
163 Cetera, quae certis non sunt iocularia signis
164 cognita, pro vario tempore nomen habent.
165 Nunc odium, nunc rusticitas, amor, impietasque,
166 symbola scurrilis sunt variata joci.
167 Unius haec generis sunt omnia, multa supersunt
168 quae non ingenio sunt patefacta meo.
169 Omnia non possum brevibus perstringere verbis,
170 nec tantum numerum nostra tabella capit.
171 Nam memorem vel qua deceant ratione lepores,
172 fama quibus laedi non inhonesta solet.
173 Hos aliqui pulchra specie ad convicia torquent,
174 atque sibi lingua liberiore placent.
175 Hos quoque scurriles dices, in eoque locabis
176 ordine, qui doctis non imitandus erit.
177 Quid moror in parvis, vitium in maioribus haeret,
178 fecundum vitium quodlibet esse solet.
179 Est iocus, in totum quem plenum Colchidos herbae,
180 ex re sarcasum Graecia docta vocat.

181 Ille odiis flagrat, fellisque exspirat odores,
182 et variis varia condicione nocet.
183 Hoc alii taxant alios, et crimina multis
184 objiciunt, Momum nec dubitanter agunt.
185 Hoc quoque salvificum cupiens eludere Christum,
186 utitur obscaeni turba profana gregis.
187 Hunc, Epicurei chorus ordinis, atque Tyranni,
188 et qui Plutonis castra sequuntur, amant.
189 Impia talis erant damnati verba latronis,
190 verba quibus Christus ludificatus homo est.
191 Turba Papistarum studiose imitatur eundem,
192 erudiit mentem quilibet inde suam.
193 Nil nisi de Christo jocularia verba loquuntur,
194 quotquot adhuc Papam numinis instar habent.
195 Et tamen argutos juvat appellare lepores,
196 sic speciem quamdam nobilitatis habent.
197 Scilicet et titulis vitium, et virtutis honore
198 gaudet, et eximiae nomina laudis amat.
199 Atque ita quod non est, falso contendit haberi,
200 hei mihi virtuti res ea saepe nocet.
201 Nam sic decipitur specie mens ipsa decori,
202 quod decus interdum non leve fucus habet,
203 tam mala sunt vicina bonis. Sic saepe putantur
204 optima, quae nullo tempore labe carent.
205 Nam quoties violis vicina urtica reperta est,
206 pro nitidis quoties carpitur illa rosis.
207 Sic quoque virtutem vitium comitatur, et illa
208 virtuti nimium proximitate nocet.
209 Hic equidem, pulchro ne decipiare colore,
210 esse oculo plus quam te vigilante decet.
211 Non ea te fallant quae sunt speciosa, nec umquam
212 decipiat mentem blanda loquela tuam.
213 Nec moveat, quod saepe jocis scurrilibus illis,
214 applaudit variis turba inhonesta modis.
215 Obscaenos obscaena decent, sua quemque voluptas
216 ducit, et immemorem non sinit esse sui.
217 Res probat artificem. Sic rem probat auctor, et illa
218 si valet, artificem posse valere puta.
219 Nulla bonos arbor poterit producere fructus,
220 si mala, sed fructu quae valet, illa valet.
221 Ergo sales odio plenos vitare memento,
222 talis et auctores non imitere joci.
223 Dixerit hic aliquis, si non imitanda, quid ergo
224 tradis, an hic forsitan perdere verba leve est ?
225 Desine mirari vitiis fit cognita virtus,
226 fitque per oppositum notior illa suum.
227 Sic ubi cognoris vitium, quod in arte jocandi
228 additur, a falsa turpibus arte viris,
229 parte fere media teneri praecepta leporis,
230 et quae sunt prima parte tenenda, tenes,
231 strictius illa licet potuissent omnia tradi,
232 totaque praescribi res breviori modo.
233 Nam quibus utendum sit ei, cui Musa placebit,
234 haec praecepta damus, non peregrina damus.
235 Doctus apud doctum juvenis sic esse facetus
236 posset, et ingenio ludere digna suo.

237 Sed tamen, ut numquam ratio haec mutetur, et ordo,
238 credere quod fieri possit, inane puto.
239 Cum rudibus, cum non doctis quandoque jocandum est,
240 hinc etiam laudem forte aliquando feres.
241 Casus in eventu tamen est, ita rarius illud
242 te facere, et magis hic abstinuisse velim,
243 aut aptare jocos istorum moribus omnes,
244 sive inhonesta illis sive faceta placent.
245 Jam quid agis ? Dicas, prorsus contraria dicis,
246 incipit in verbis maxima pugna tuis.
247 Obscaenos vitare jocos, inhonestaque verba,
248 nunc obscaena tamen rursum imitanda doces,
249 atque tuam prodis mutatis versibus artem,
250 cur non quod coepit Musa tuetur opus ?
251 Non ita sed falso juvenis me crimine damnas,
252 consilii ratio non fuit illa mei.
253 Trado ego, post etiam tradam praecepta jocandi,
254 a vitiis carmen debet abesse meum.
255 Qui ludit quoscumque sales, dulcesque lepores,
256 recte agit, et rectis ambulat ille viis.
257 Non tamen hoc vitium est aliquando levissima verba
258 dicere, sed vitium est si mala verba probes.
259 Quis vocet audacem ? Qui verba audacia profert,
260 quis bellatorem ? Qui fera bella canit.
261 Quis timidum ? Subiti qui dicit verba timoris,
262 quis, stolidum si quis nominet, inde vocet ?
263 Semper scurrilem, scurrilem nomine dicas,
264 qui levis est semper, dicitur ille levis.
265 Obscaenos, stolidos, turpes, vanosque lepores,
266 omnibus in rebus qui probat, ille probat.
267 Carmine te nostro satis haec didicisse putamus,
268 et non est magnus discere posse labor.
269 Sponte patet cuivis ratio vitiosa jocandi,
270 et non obscuras res habet ista notas.
271 Iudicio est facili vitium cognoscere cunctis,
272 qui cupit ad vitium currere, lata via est,
273 sed non sponte patent quae sunt bona, et absque labore,
274 nam virtus magno parva labore venit.
275 Et quaecumque valent, quae sunt pulcherrima in orbe,
276 difficiles aditus semper habere solent.
277 Quos, quia docta potest faciles tibi reddere Musa,
278 Musa animo semper sit veneranda tuo.
279 Disce bonas artes, mitescunt pectora ab illis,
280 artibus ingenuus quilibet esse potest.
281 His aditus patet ad nostram quam tradimus artem,
282 his tibi nota via est, his tibi plana via est.
283 Nec poteris docte certa ratione joculari,
284 si forte illorum destituaris ope.
285 Nam qui non doctas animum excoluere per artes,
286 illi Cecropios non didicere sales.
287 Non didicere quidem, certum est, nec discere possunt,
288 quamvis nonnumquam se didicisse putant.
289 Et licet interdum verbis ridenda loquantur,
290 nusquam est, si spectes singula, mica salis.
291 Turpibus involvunt dictis quaecumque loquantur,
292 atque jocos sola garrulitate probant.

293 His ego si cupiam certas praescribere leges,
294 jure equidem cerebri dicar habere parum.
295 Quod prodest porcis nitidas ostendere gemmas,
296 quod cumulare novis fluctibus Albis aquas :
297 hoc ipsum prodest illis praecepta jocandi
298 tradere, qui sanctas non coluere Deas.
299 Perpetuo salibus placeant sibi turpibus illi,
300 et levibus stulta garrulitate jocis.
301 De quibus ut vitium certo cognoscere possis
302 diximus, et ratio jam patet illa tibi,
303 nunc ea quae placidas deceant jocularia Musas,
304 dicam ex propositi condicione mei.
305 Scilicet argutis in vocibus optima laus est,
306 verbaque nonnullis ingeniosa placent.
307 Salsaque delectant, sunt insperata movendo
308 pectore, si videas, omnibus apta jocis.
309 Saepe suis ornata modis : quae dicta loquendo
310 finguntur, varia condicione valent.
311 De quibus haec monuit tantum mea Musa legentem,
312 pauca ea sufficiant, et monuisse sat est.
313 Haec tibi sunt longum potius discenda per usum,
314 disce per exemplum sponte disertus eris,
315 disce tamen magno non dediscenda labore,
316 disce sed a doctis tu quoque doctus eris.
317 Quae perfecta putes, exemplis fidere tutum est,
318 optima quaeque prius sunt imitanda tibi.
319 Siquis erit forsitan nulla ratione facetus,
320 qua melius fugias arte docendus eris.
321 Saepe refer tecum quam sit scurrile locutus,
322 et pone ante oculos singula verba tuos.
323 Illud, et illud habet vitii, multa impia dixit,
324 multa supercilio non patienda gravi.
325 Nil habet eximium, nulla est ex parte facetus,
326 non levitate animus non feritate caret.
327 Haec refer, hinc illum caute vitare memento,
328 hinc odio dignum quolibet esse puta.
329 Non mirere hominem, non commoda verba loquentis,
330 tu mihi (dic) certe non imitandus eris.
331 Nec te decipiat, species non fallat honesti,
332 quique aliquando decus non leve fucus habet.
333 Scilicet ut sapiens videatur et optimus ille
334 efficit, in totum qui ratione caret.
335 Ex stupido placidum regem facit ille bubulco,
336 femina quae certo est, virgo sit ille facit.
337 Denique Taenarius num decipit omnia fucus,
338 fallere quem quaeso non color ille potest ?
339 Tu tibi fac constes, multum constantia prodest,
340 omnibus a vitiis hac duce tutus eris.
341 Sive aliquis tibi laudarit, quem laude putabis
342 indignum, et dicet : "Fac imitere virum".
343 Firma tibi stet non dubia sententia mente,
344 persuasus verbis ne capiare, vide.
345 Sive aliquis forte immerito reprehenderit illum,
346 quem veris dignum laudibus esse scias.
347 Laudibus est dignus, perstet sententia firma,
348 et fac ne cedant verba aliena tuis.

349 Sic neque quae splendent peregrino tincta colore,
350 nec mentem fallat res speciosa tuam.
351 Haec ubi cognoris, nec enim cognosse pudebit,
352 quid salibus possis experiare licet.
353 Experimenta docent, et cuncta per illa probantur,
354 ante oculos semper stant manifesta tuos.
355 Fallere non possunt, sed demonstrata relinquunt
356 singula iudicio quaeque notanda tuo.
357 Ac velut aurifaber fulvum probat ignibus aurum,
358 imponens calidis frustra cremenda focis.
359 Sic quascumque artes certo experientia signo,
360 has probat esse bonas, has probat esse malas.
361 Tu quoque quid possis, quid desit in arte jocandi,
362 scilicet experiens omnia, certus eris.
363 Addiscenda quidem praebebit plurima tempus,
364 emendanda tibi quaelibet hora dabit.
365 Quotidie melior ratio tibi sponte patebit,
366 et studio accedet pars quotacumque tuo.
367 Mutua namque dies docet, et se corrigit ultro,
368 ipsius illa etiam docta magistra sua est.
369 Jamque ubi ridiculis fortasse jocabere dictis,
370 et soriis dices verba faceta tuis :
371 praecipue est pulchri ratio tibi habenda decori,
372 semper honestatis te meminisse decet.
373 Semper honestatis, semper meminisse decori
374 dicere sive velis seria, sive jocos.
375 Nam licet haec forsitan possint contraria dici,
376 neutrum sermoni debet abesse tuo.
377 Haec conjuncta placent, et tu conjungere noris,
378 delectant lepidis seria mixta jocis.
379 Qui gravis est semper, nimio qui laudis honore
380 ponderat extollens seria, crimen habet.
381 Sic vitium est, salibus nimis indulgere jocosque,
382 nec nisi perpetuo verba jocosa loqui.
383 Non decet haec teneras effusa licentia Musas,
384 contemptum studii res habet illa tui.
385 Seria contineant (sed si permittat honestum)
386 addita, ceu passim sparsa, parerga jocis.
387 Non alios carpant, sed sint sine morsibus illi,
388 non habeant odii semina tecta tui.
389 Temporibus variant, variant ratione locorum,
390 hic ego te fieri Protea posse velim,
391 si tibi cum laetis, si cum lugente jocandum est,
392 non uno fieri debet utrumque modo.
393 Namque ea sollicito quae sunt astricta dolore
394 pectora, Cecropiis sunt inimica jocis.
395 Scilicet haec ratio pugnancia fecit, utrumque
396 in rebus proprium jussit habere locum.
397 Ergo simultates, odium, nec rarius iram,
398 nata ex Cecropiis vidimus esse jocis.
399 Sicut et herba etiam, si quis bene nesciat uti,
400 saepe eadem prodest, saepe eademque nocet.
401 Dic mihi cum salibus quae convenientia luctus ?
402 Conveniat rapidis sic quoque ovile lupis.
403 Crede mihi, nam certa fides, res ipsa probata est,
404 maerorem ex salibus crescere posse tuis.

405 Nempe aliquis justum qui perfert corde dolorem,
406 ludibrio forsán se putet esse tibi.
407 Et sive illa tuae durae sententia mentis,
408 sive loco forsán suspicionis erit.
409 Te tamen invisum post illud semper habebit,
410 et capiti optabit tristia multa tuo.
411 Haec vitare decet mala ne moveatur ad iram.
412 Aut te tale aliquod crimen habere putet.
413 Ergo jocis, ubi tristis adest, vel parcius uti
414 vel potius risus continuisse decet.
415 Si tamen est illi mitis natura, nec illam
416 urit adhuc ardens asperitate dolor :
417 proderit ad curas animi luctumque fugandum,
418 ingenuos illi parce adhibere sales.
419 Sin minus et verbis acrem lenire dolorem
420 non licet, in primis abstinuisse velim.
421 Talia quae praesens et tempus et hora monebit,
422 consilium est caute velle notare meum.
423 Scilicet haec varie varias mutantur in horas
424 et retinent miras dissimilesque vices
425 non status est idem rerum, neque semper in una
426 quaelibet, aut simili condicione manent.
427 Omnia dependent tenui mortalia filo,
428 perpetuo nulli sors satis aequa manet.
429 Gaudia non semper, non semper verna manebunt
430 tempora, post paucos nubila facta dies.
431 Nunc tibi tristitiam vario ex discrimine rerum,
432 nunc aliud tempus gaudia multa dabit.
433 Nunc aliud dabit officium, variosque labores,
434 nunc aliud rursum quod mediteris opus.
435 His aptanda tua est ratio diversa jocandi,
436 flectenda in multos et varianda modos.
437 Nec decet in causis ulla ratione jocari
438 consiliisque hominum, quae grave pondus habent.
439 Hic potior gravitas, magis his sapientia rebus
440 convenit, hic risum te cohibere decet.
441 Sacra Deo quicumque facit, meminisse jocorum
442 si velit a laeso numine crimen habet.
443 Haec moneo exemplis tantum, sescenta supersunt,
444 quae jam sunt versu praetereunda meo.
445 Nam mihi si voces atque ora sonantia centum,
446 si vel mille queat lingua referre sonos :
447 omnia non possem versu pertexere nostro,
448 nec sterilis tantum Musa subiret onus.
449 Sic variat tempus, sic omnia tempore cedunt,
450 sic etiam moneo tempore cuncta notes.
451 Nec locus est idem, terra non semper in unas
452 vivitur, hoc etenim vivere turpe putant.
453 Te non perpetuo credas sine crimine magno
454 posse domi ad patrios delituisse focos,
455 Sisyphides fama celebris non esset Ulysses,
456 nec tam clara viris insula Graia foret :
457 si non tot populos, quondam vidisset et urbes,
458 errans in vasto tempora longa mari.
459 Si non Alcides passim tot monstra necasset,
460 forte suo minime notior esset avo.

461 Ergo tot exemplis motus, si invisere temptes
462 diversis forsitan dissita regna plagis :
463 nosse hominum mores, vitam, studiumque fidemque,
464 nosse quibus facile mens capienda modis.
465 Ex studiis adverte animos, signisque loquendi,
466 ex verbis etiam signa aliquando petes.
467 Inde tuos optare jocos, aptare lepores
468 noris, et ingenium fingere posse tuum.
469 Si fueris Romae, consuescas moribus urbis,
470 saepe animum tibi sunt jura datura novum.
471 Et quascumque alias venies peregrinus in oras,
472 una eadem maneat regula firma tibi.
473 Proderit et, qualis persona sit ipsa, videre,
474 dicere cui deceat verba jocosa viro.
475 Disce quibus juvenes salibus capiantur, et illi
476 tempore quos canos longa senecta facit,
477 disce quid edoctis placeat cognoscere dignum.
478 Disce quibus salibus mens erit apta capi.
479 Denique quid placeat semper servato, nec umquam
480 omnia quae debes te didicisse puta.
481 Quae deceat regem vestis, quae forma potentem,
482 usu perpetuo pictor, et arte tenet :
483 cuique suos homini novit tribuisse colores,
484 non similes vestes Croesus et Irus habent :
485 sic quoscumque jocos quaevis persona requirat,
486 haec sunt ingenio praemeditanda tuo :
487 nunc tibi cum noto, nunc hospite saepe jocandum.
488 Crede mihi simili non ubicumque modo.
489 Quoslibet ille sales laudat, licet auctor eorum
490 si quid inest vitii dissimulare cupit.
491 Hic licet interdum patulas tibi praebeat aures
492 et dicat, lepidus certe erat ille jocus :
493 non tamen his satis est tutum confidere verbis
494 haec levitas nullo fine probata fuit.
495 Verba quid esse putas stolidae nisi murmura linguae,
496 vocalemque hominis qui venit ore sonum ?
497 Verba nitore suo fallunt hominesque deosque,
498 et non sunt uno suscipienda modo.
499 Haec feriunt patulas concinnis vocibus aures,
500 et rapiunt animos ad sua jussa leves :
501 non ea te fallant subito, quia fallere possunt,
502 de fuco tali verba priora nota.
503 Si peregrinus adest, debet pudibundus et aptus,
504 conveniensque hominis moribus esse jocus,
505 non levis aut petulans non ullis vocibus audax,
506 qualis saepe animo liberiore venit.
507 Quam potes in melius totam deflecte loquelam,
508 iudicium discas fallere posse tuum,
509 si rudis est, ruditas non sit tibi causa jocandi,
510 si timidus, non sit turgidus inde jocus :
511 sed moneo, si quis fuerit peregrinus, an idem
512 ingenua cultus sit quoque ab arte, vide :
513 si fuerit, certa poteris ratione joculari,
514 ac velut ad socios verba jocosa loqui,
515 namque hominum prodest tibi conciliare favorem.
516 Sic natura homines conciliare docet.

517 Sin minus, abstineas, et sit tibi magna joculari
518 religio, sapiens inde putandus eris.
519 Nam cui non doctas mens est exulta per artes,
520 hunc merito rabidam dixeris esse feram ;
521 ille jocos, ut contemnit, sic omnia dicta
522 perdis, et in verbo est gratia nulla tuo :
523 non illi praecepta damus, rudiore Minerva
524 non nostris numeris erudiendus erit.
525 Cui placet, et cordi est nativus splendor honesti,
526 me legat, et lecto carmine doctus erit.
527 Nec sibi, quod leviora canam, quasi vana putentur,
528 praeceptis credas non opus esse meis :
529 parva quidem, et tenui de stirpe profecta fatemur,
530 illa fuere prius praecipienda mihi.
531 Tu quia parva etiam discendi tempore prosunt,
532 esse aliquid saltem carmina nostra puta.
533 Judicioque tuo licet haec leviora putentur,
534 forte tamen fructus non nihil inde feres.
535 Tempus erit, certe quo te meminisse juvabit,
536 et dices, haec me non didicisse pudet.
537 Numquid ab exiguis bene si cumuletur in unum,
538 magna etiam additio quotidiana facit ?
539 Quod si nostra minus, quae dico, valere putabis,
540 inque animo nequeunt pondus habere tuo :
541 quando cupis parvis summa affectare relictis,
542 Icarium casus te meminisse decet.
543 Sic tenues forsitan non aspernabere Musas,
544 et quae de fundo paupere dona damus.
545 Fallor ? An ista tuam subito hic persuasio mentem,
546 omnibus ut primum parva tenenda putes ?
547 Certe equidem non vana tuae est sententia menti,
548 scilicet expertus quae facis, illa facis.
549 Nunc nostrae pars una viae, pars prima peracta est,
550 hic teneat thalamum nostra Thalia suum.

DE ARTE JOCANDI, LIBER SECUNDUS.

J_2

v.1 Rursus ades nostro jam, non invita, labori
2 carminis Euphrosyne pars quotacumque mei,
3 nunc magis audaci temptabimus aequora cursu,
4 ibit et in mediis nostra carina vadis,
5 perge etiam juvenis veloci insistere remo,
6 et nihil obstabit quod remoretur iter.
7 Non te paeniteat studii, pudeatve laboris,
8 disce animum studio vincere posse tuum.
9 Doctorum studii nullum pudet ante virorum,
10 ultima quam summum finiat hora diem.
11 Est illi didicisse animus cum plurima norit,
12 cur ita ? Quod semper discere possit habet.
13 Et te paeniteat ? Cui flos tener ille juventae

14 floret, et est nulla barba resecta manu ?
15 Si sapis, adpropera, coeptoque insiste labori,
16 crede mihi ex illo commoda multa ferēs,
17 nec quia prima tenes et parva elementa jocandi,
18 omnia perfecte te didicisse putes,
19 umbra tibi visae est, et non nisi imago leporis,
20 sed quae digna tamen cognitione fuit.
21 Nunc tibi quaerendi fontes, animoque notandi,
22 crede mihi dulces inde bibuntur aquae.
23 Nulla suis sine principiis, sine origine certa est
24 cognita, nec causis res caret ulla suis.
25 Quas bene qui potuit propriis cognoscere signis,
26 iudicio felix dicitur ille meo.
27 Haec quoque proveniunt de fontibus omnia certis
28 quae tibi jam lector nostra Thalia dabit,
29 sunt ea limitibus certis inclusa modisque,
30 in quibus et fines contineantur habent,
31 quos ultra et citra, numquam consistere possunt,
32 his etenim lepidi stantque caduntque joci.
33 Sunt gemini fontes, duplex et origo leporum,
34 omnes stant duplici condicione sales,
35 scilicet aut rebus varie nascuntur ab ipsis,
36 aut bene fingendi nominis arte valent,
37 omnibus his uti varia ratione licebit,
38 sed tamen unius maximus usus erit,
39 saepe quidem poteris de te permulta joci.
40 De rebus dicens multa faceta tuis.
41 Hic tibi cum pulchre tu sis tibi cognitus ipsi,
42 praeceptis statuo non opus esse meis.
43 Nam vitae fortuna tuae, studiumque laborque,
44 quae dicas quovis tempore, multa dabunt,
45 id moneo tantum, de te quaecumque loqueris,
46 orna simplicibus singula verba jocis,
47 ne (quod jam multi faciunt) videare jocando
48 egregias laudes attribuisse tibi,
49 quin etiam de te parce decet ipse joceris,
50 inque tuo semper nomine parcus eris,
51 et si non rerum sit mentio facta tuarum,
52 te quoque posse velim non meminisse tui.
53 Quod si forte aliquis dubitans tua nomina quaerit,
54 fortunaequae velit certior esse tuae,
55 quaerenti placide verbis occurre facietis,
56 ut tamen his verbis certior esse queat,
57 omnia sic dicas, ne sis contemptior ulli,
58 neve aliis multo dignior esse velis,
59 scilicet hic laus est, posse inter utrumque manere.
60 Quod medium est, numquam non solet esse bonum.
61 Tu quoque perpetuo medium tenuisse studebis,
62 sic poterit salibus crimen abesse tuis,
63 sic poterit numquam de te sine laude joci,
64 sic poteris lepidis nomen habere jocis.
65 Verum ubi propones alios tibi, de quibus ausis,
66 cum placet, interdum verba jocosa loqui,
67 longe aliis te posse opus est rationibus uti,
68 hic via nunc alia est aggredienda tibi,
69 multa quidem sunt de multis jocularia dicta,

70 deque alio quivis dicere multa potest.
71 Sed quam difficile est summam virtutis ad arcem,
72 quam grave in aethereas scandere posse domos.
73 Tam minime hic facile est, odium vitare jocanti,
74 et salibus nulli displicuisse tuis,
75 hoc opus, hic labor est, certas praescribere leges,
76 non capit incertos nostra tabella modos.
77 Mille hominum species, animorum mira voluntas,
78 quotque homines, totidem pectora semper erunt.
79 Quis dabit exiguo praecepta inclusa libello ?
80 Ut nihil hic sese praeteriisse putet ?
81 Vix ea praestiterint Musae, vix augur Apollo,
82 vix tu carminibus Naso poeta tuis,
83 quo magis agnoscens, quam sit mihi curta supellex,
84 impar opus fateor viribus esse meis.
85 Cur igitur (dices) temptas praecepta jocandi
86 scribere ? Tam vanum quid meditaris opus.
87 Desine non equidem nostra est haec culpa, nec artis,
88 nec mea (quod dicis) carmina crimen habet,
89 humanae in culpa est dubiae inconstantia mentis.
90 Quae non ut debet constat ubique sibi.
91 Ille jocos de se fictos probat, ille superbe
92 culpat, et in pejus singula verba rapit.
93 Quae quia mutari nequeunt, damnabimus artem ?
94 Dicemusque omnes crimen habere jocos ?
95 Non ita, nec visum est illis, quibus ordine certo,
96 hanc artem primum cura docere fuit,
97 quos quia nos sequimur, quia non pudet esse secutos,
98 jam dabimus leges, hic quoque ut ante, tibi.
99 Primo igitur, de quo possis, liceatque jocari,
100 perspice, delectus semper habendus erit.
101 Elige non falsos quibus es conjunctus amicos,
102 semper ab ignotis abstinuisse velis,
103 si tamen ignotus lepida te voce lacessat,
104 ne timido credat pectore, redde vicem.
105 Parque pari referens, dicas quod mordeat ipsum,
106 hoc licet, hoc etiam res aliquando jubet.
107 Interdum siluisse decet, nocet esse jocatum,
108 parque pari minime, velle referre decet.
109 Nempe ubi praepollens aliquis virtute, potensque
110 ingenua de te luserit arte sales,
111 namque animi indicium est agrestis, ad omnia dicta,
112 mutua et ad lepidos verba referre jocos.
113 Tu concede aliquid majoribus, artis id ipsum est,
114 et bene quae nosti dissimulare queas,
115 verum apud aequales aequalibus utere verbis,
116 cuique jocis licet hic reddere posse jocos.
117 Sed tamen invidiae morsus rabidissimus absit,
118 omnibus in dictis semper apertus eris,
119 quae dicis joca, simplicibus dic omnia verbis,
120 ne quisquam credat praemeditata loqui.
121 Cur ita ? Ne forsitan videare instructus ad illud,
122 ut peteres audax scommate quemque tuo.
123 Sic inimicitiae facili ratione parantur,
124 inde simultates, iraque longa venit,
125 saepe alios lauda, poteris laudare jocando,

126 crede mihi multum laus sua cuique placet.
127 Absentes numquam socios reprehende jocando,
128 hic moneo semper parcior esse velis.
129 Quid multis ? Genus hoc totum brevitate probandum est,
130 nulla hic ubertas, copia nulla placet.
131 Si vis liberius, neque non cum laude jocari,
132 elige res medias, sponte disertus eris,
133 multa potes lepidis generatim dicere verbis,
134 communes facile est ludere posse sales,
135 ut neque respiciant ullo tua nomina verbo,
136 atque ideo de te non videare loqui,
137 nec tamen ex aliis sumpti sorte esse putentur
138 deque aliis igitur non videare loqui,
139 haec duo te jubeo vitiosa extrema notare,
140 quae sunt in lepidis parte ab utraque jocis,
141 est aliud, dum scurrilem declinat ad artem,
142 et vagus existens diffluit inde jocus,
143 est aliud, vinclis nimium cum stringitur artis.
144 Ut nullas vires possit habere lepos,
145 hoc opus hic labor est, medium tenvisse jocanti,
146 difficile, excessus posse notare duos.
147 Nam facile in vitium possunt transire lepores,
148 et facile est metam transiliisse tibi,
149 sunt exempla domi, sunt et foris, obvia passim,
150 sive aliquis dicat seria, sive jocos,
151 est labor, est studium, virtus, fortuna, voluptas,
152 milia sunt quae non nostra tabella capit.
153 De Veneris studio numquid permulta jocantur ?
154 In sua vulnificus quos juga traxit amor ?
155 Et tamen hoc ipso meretricia verba loquuntur.
156 Omnia lascivis sunt ibi plena jocis.
157 Illa equidem non est ratio laudata jocandi,
158 nec meruit salibus nomen habere meis.
159 Cur ita ? Nam late nimis extra saepta vagatur,
160 nec se limitibus continet illa suis.
161 Vincula solvuntur nimium laxata jocandi,
162 et salibus parvis magna fenestra patet.
163 Sic ubi, in angustos nimium concludere fines
164 coeperis, ingenuum qui valet arte jocum,
165 desinit esse jocus, neque jam delectat, et illis
166 quas ita designat, gratia rebus abest.
167 Res patet exemplis, toto est notissima caelo,
168 haec bene res animo est notificanda tuo.
169 Si merita cupiens virtutem extollere laude,
170 virtutem summum dixeris esse bonum.
171 Dixeris egregie, nec habebis pauca sophorum
172 quae sunt iudicio congrua scripta tuo.
173 Sed tamen hic nullus lepor est, et nulla venustas,
174 nemo potest tali laetus abire joco.
175 Quandoquidem, nimis angustus quia ponitur illi
176 terminus, ut fuerat desinit esse jocus.
177 Verum equidem melius tangentem sidera montem
178 finxeris, et silvas quae remorentur iter,
179 finxeris in celsa virtutem rupe sedere,
180 indutam palla versicolore Deam.
181 Atque subinde alios homines ascendere ad illam

182 conari, media sed remanere viae.
183 Audiatur haec aliquis, perrumpet pectora risu,
184 ingenii laudans flumina magna tui.
185 Talia multa dabit variarum occasio rerum,
186 quae valet in lepidis non minus arte jocis.
187 Cum licet, hanc serva, numquam observasse pigebit,
188 ut facile placeas omnibus, illa dabit.
189 Namque modis quia delectat variatio miris,
190 atque oculos hominum res variata capit.
191 Haec dabit aestivis depictum floribus hortum,
192 ex qua decerpas dulcia multa tibi.
193 Scilicet ingenua deductos arte lepores
194 et multa dignos nobilitate jocos,
195 nunc tibi de Musis nunc de Virtutis amore,
196 deque aliis rebus verba jocosa dabit.
197 Sed quoniam varie varias mutatur in horas,
198 nec semper constans una eademque manet
199 forsitan eveniet, facile ut labare jocando,
200 et subito in varios diripiare modos,
201 si quoscumque jocos veniens occasio praebet,
202 intempestiva garrulitate probes
203 ut bene et arte sales omnes distinguere possis,
204 sunt ea quae dicam pauca tenenda tibi,
205 fallitur ingenio quicumque ita sensit, ut aptam
206 materiam salibus quamlibet esse putet.
207 Omnia quae duris designant tristia verbis,
208 omnia quae dici seria dicta solent,
209 haec lepidis prorsus salibus contraria dices
210 commodus et pulcher non erit inde jocus.
211 Quo magis observes quae tempus et hora requirat,
212 atque ea praecipue commoditate probes.
213 Ingenium cujusque notes et pectora noris,
214 nosse quidem semper proderit illa tibi.
215 O quantum est novisse, hominum quid pectoris intus,
216 vim certe, ut placeas omnibus, istud habet,
217 ergo ubi cognoris mores, studiumque fidemque,
218 (nam prius haudquaquam luseris arte sales)
219 inde jocos et verba jocis affingere noris,
220 convenient rebus verba jocosa suis,
221 de Veneris puero jocus est jucundus amanti,
222 non illi multum bellica Diva placet.
223 Sic Helenae laudes Paridi, dictumque placebant,
224 ah pereant per quos femina crimen habet.
225 Sic jucundus erat jocus hic, et amabilis illi,
226 bella gerant alii, tu, Pari, semper ama.
227 Non sonus, aut pulchrum deceat quae cantio Phoebum,
228 musica non illi dulcior ulla fuit.
229 Musa poetarum jocus est, namque omnia vates,
230 quae sunt de claris vatibus orta juvant.
231 Fabula ficta placet, sunt omnia grata poetis,
232 quae joca de Musis commemorare potes.
233 Ergo ubi Phoebus cum vate jocabere vates,
234 dicere multa licet, fingere multa licet.
235 Finge vel Aonidum montem, vel pulchra sororum
236 nomina, finge aliud, sponte disertus eris,
237 nablia finge (licet) citharas, chelesque sonantes,

238 fictio (crede mihi) plena leporis erit.
239 Sidera convexi vaga qui scrutantur Olympi,
240 his solet ex stellis gratior esse locus.
241 Hic Caper, hic Pisces, Gemini, Leo, Cancer et Ursus
242 ficta locum salibus materiemque dabunt,
243 quid, quos ipsa sales etiam convivia praebent
244 enumerem ? Numero cedit arena meo.
245 Et fora conveniunt, et res sunt apta jocanti,
246 saepe est in medio fabula dicta foro.
247 Judicibus duris nunc mens flectenda lepore est,
248 jamque favor populi conciliandus erit.
249 Tam Consul, Judexque gravis, laetusque Senatus
250 mitescet salibus, quam fera turba, tuis.
251 Fabula ficta placet communiter omnibus illis
252 duritiae qui non ferrea corda gerunt,
253 namque animos hominum recreat, curasque resolvit,
254 et paucis salibus seria magna tegit,
255 vidimus hac juvenes laetari pectore multos,
256 hic hilares olim vidimus esse senes,
257 hic Phrygiae doctum scriptorem imitare fabellae
258 fac, sit ut ille joci pars quotacumque tui.
259 Ille venustatis semper, blandique leporis,
260 pulcher figmenti doctor et auctor erit,
261 ille quidem pavidis maestissima pectora curis.
262 Liberat, ex illo fonte disertus eris.
263 Hinc, apud unanimes si convivator amicos
264 adsis, haud dubites verba jocosa loqui.
265 Ac ubi de lepidis rebus narratio coepta est,
266 si jucunda aliis commemorare velis,
267 omnia perspicue ut narres, sub imagine quadam,
268 effigies verbis est adhibenda tuis,
269 adde notas, signa adde rei, memorandaque multa,
270 adde notam certi temporis, adde locum.
271 Junge hominis mores ridicula verba locuti,
272 et subeant animum milia multa tuum.
273 Adde rei flores, et persuadentia verba,
274 ut nisi quod verum est nil videare loqui.
275 Non tamen ut mimus quidam videaris et actor,
276 corpore vel manibus gesticulator eris.
277 Non agis, at narras, narrantis munere fungi
278 talibus in rebus te meminisse decet,
279 est opus hic potius cultae tibi dote Minervae,
280 qua prohibente male quae facis, illa facis.
281 Narranti vultus non durus et horridus adsit,
282 nunc vacuum rugis tristibus esse decet.
283 Namque decens facilem commendat gratia vultum,
284 et magis interdum quam jocus ipse placet.
285 Quis dubitat ? Quos ille jocos quae fronte lepores
286 dicet, cui facies Stoica, torva, ferox ?
287 Qualibus ille oculis narrabit et ore fabellam ?
288 Denique digna joco qua ratione dabit ?
289 Scilicet ornatum vultus ibi detrahit omnem,
290 omnia dicendo prodigiosa facit.
291 Ut bene Thersites norit praecepta jocandi,
292 ac sciat ex illis multa faceta loqui.
293 Si tamen incipiet vultu nova verba sereno,

294 turbabit dictis pectora laeta suis.
295 Denique si loquitur, semper monstrosa loquetur,
296 verbaque certe ipso paene timenda sono.
297 Causa erit in taetro distortus corpore vultus,
298 causa erit indignis lingua tremenda modis
299 tanta creatricis, vulgata potentia, regnans
300 naturae, lepidum sola gubernat opus.
301 Illa homines ut displiceant hominique probentur,
302 illa alios aliis posse placere dedit,
303 illa dat ingenium, formam, decus atque lepores,
304 illa dedit vitae munere posse frui.
305 Est aliquid studium, laudatur carmine vatum
306 artifices doctos quos facit, usus, habens.
307 Hunc quoque naturae forsán conferre licebit.
308 Illa tamen multo est nobilitate prior.
309 Donaue naturae nullo vincuntur ab usu,
310 nam divina homini, quae dedit, illa dedit.
311 Nota quidem res est, sed non indigna probari,
312 et cur non etiam nota probare licet ?
313 Cui dedit ingenium studiis natura paratum,
314 illi qua dederit condicione, vide.
315 Non habeat tantum, sed quaelibet ardua temptans
316 in studio, ingenii vi superare queat.
317 Haec illi (quia sunt etiam) leviora videntur
318 quam stolidae linguae garrula lingua loqui.
319 Sic aliquos vidi non praemeditata loquendo
320 ingenuis verbis multa faceta loqui.
321 Causa erat eximia naturae dote juvari,
322 causa erat ingenium tendere posse suum.
323 Non ea contingunt praestantia dona cuivis
324 o quam naturae est rarius illud opus.
325 Sive tamen magna ingenii te dote beavit,
326 sive tibi pectus vix mediocre dedit.
327 Haec animo subeant, non omnia possumus omnes,
328 nec dubites semper multa deesse tibi,
329 utere natura, praestantibus utere donis,
330 nullus id infandum credidit esse nefas.
331 Dic alias tamen esse aliquid, dic posse volentes
332 omnia, nec studio nil tribuisse velis.
333 Illa adeo numquam subeat persuasio mentem,
334 omnibus ingeniis acrius esse tuum,
335 vix sibi in humanis constat mens optima rebus,
336 sensibus interdum fallitur illa suis.
337 Saepe quis ingenium sibi finxerat esse jocosum
338 qui tamen in salibus prorsus ineptus erat.
339 Atque ita dum valde lepidus contendit haberi,
340 quam cupit, esse minus nil tamen esse potest,
341 et quia se credit multum praestare jocando,
342 errore insulsus fit magis iste suo.
343 Quo magis, o juvenis, ne talis opinio fallat,
344 neu tali sensu decipiare, cave,
345 nec tantum, ingenium si non est dotibus amplum,
346 te pudeat vitae paeniteatque tuae,
347 crede mihi, in centum vix est mortalibus unus,
348 qui flecti ad lepidos non queat arte jocos,
349 arte feras, rabidos ursos, aprosque domamus,

350 ars homini in studiis omnia posse dedit.
351 Omnia vincuntur studio, ceduntque labori,
352 perfectumque facit quod labor urget opus.
353 Ergo jocos lepidosque sales evince volendo,
354 naturae studio damna repende tuae.
355 Ingeniumque decet mediocre, impendere curam,
356 ut studio superes, sic quoque magnus eris,
357 quandoquidem non forma decus modo corporis addit,
358 ars etiam claros ingeniosa facit,
359 auctor et inceptor Phrygiae scriptorque fabellae,
360 corpore deformis, pectore clarus erat.
361 Ut careat forma, nihilominus arte probatur,
362 et certe multum, qui valet arte, valet.
363 Nota cano, sed nota etiam didicisse juvabit,
364 forsitan et laudis non nihil inde ferēs,
365 hactenus ex rebus qua sit ratione jocandum
366 imparibus docuit nostra Thalia modis,
367 quae bene si noris, neque enim novisse pigebit,
368 ingenii vires experiare tui,
369 nec nostris contentus eris, majora requires,
370 ut facile invenias jam tibi plana via est.
371 Utere carminibus certo velut indice nostris,
372 sic instar statuæ Mercurialis erunt,
373 quot caelum stellas, quot habet mare flumina et undas,
374 quot numquam domitas silva Bohema feras,
375 tot (mihi crede) dabit dulces res ipsa lepores,
376 ante oculos venient commoda et apta tuos.
377 Sive petis juvenem, cum quo ratione joceris,
378 mille jocos aetas laetior illa dabit.
379 Quoque valent studio, multum jocus inde placebit,
380 inde etiam noris ludere posse sales,
381 seu te forte juvat, vetulis quae convenit aetas
382 et cupis annosos exhilarare senes,
383 sponte tibi obvenient tardae placitura senectae
384 plurima, quae varium tempus et hora dabit.
385 Plurima dicentem quoque praesens causa monebit,
386 praesentis memorem temporis esse decet.
387 Haec memori si pauca animo praecepta tenebis,
388 acceptus salibus cuilibet esse potes.
389 Si modo res curae est, ut convenientia spectes,
390 quae bene conveniunt, omnibus illa placent.
391 Quam tibi praecipue decet hic impendere curam
392 namque joci ex rebus crebrior usus erit.
393 Quandoquidem bene praevisam rem verba sequuntur,
394 ponenda in verbis ultima cura tibi est.
395 Est tamen et varie nihilominus ille probatus,
396 qui venit ex dicto conveniente, lepos.
397 Hic vatū exemplo te fingere posse necesse est
398 plurima, fingendo nam jocus ille valet,
399 quaeris an hoc liceat? Mendaces fingere nugas,
400 non licet, at doctis fingere multa licet.
401 Plurima doctiloqui norunt effingere vates,
402 haec laus officii est Musa diserta tui.
403 Inde poetarum summus laudatur Homerus:
404 hinc et Virgilii fama perennis erit.
405 Saepe movet mentes hominum sub imagine veri,

406 saepe etiam meruit fabula ficta fidem.
407 Objicis, indocti quoque plurima fingere norunt,
408 et qui non possit fingere nullus erit.
409 Est ita, sed stolidi sunt prorsus inania vulgi
410 figmenta, et nullis ingeniosa modis.
411 Quis probet ingenium ? Si mundos mille veraces
412 et fingas motum quemque tenere suum ?
413 Quis figmenta probet ? Si quemlibet absque labore
414 Caelestes dicas scandere posse domos ?
415 Si dicas magno ruiturum pondere caelum,
416 quis nisi mentis inops haec tua dicta probet ?
417 Ergo ea quae finges, moneo sint proxima veris
418 absurdum dictu quod foret omne fuge.
419 Quod nisi, quid tempus, quid postulet hora, videbis
420 quid persona, locus, prorsus ineptus eris.
421 Fingito sed studeas ne quis mendacia credat,
422 neve queri possit dura fuisse, cave.
423 Sed probat in verbis adjunctos arte lepores,
424 et tamen haec eadem ficta fuisse neget,
425 haec est nobilium vigilans prudentia vatum,
426 et studium et facilis vena imitanda tibi.
427 Ingenii vires, ars, exercenda, labores
428 vincendi, et parvo tempore doctus eris.
429 Labitur in pejus si sit rubigine laesum
430 nec manet ingenio quod fuit ante decus.
431 Sicut in umbrosis et sole carentibus illis,
432 si qua fuere diu sorte reposta, locis.
433 Si non versentur, canescunt tempore parvo,
434 et gelido cernas omnia plena situ.
435 Ergo intende animum, videas quae nomina possint
436 ad lepidos flecti qua ratione, jocos.
437 Multa quidem natura illis inidonea fecit,
438 quae nimis ingrato sunt metuenda sono.
439 Multa tamen reperire licet satis apta jocando,
440 multa tibi Latium, Graecia multa dabit.
441 Tu modo ne tumidus forte ista vocabula spernas,
442 nec dicas pueris convenit iste labor.
443 Crede mihi, lepidi nonnumquam gratia dicti
444 non levius, quam vox seria, pondus habet.
445 Hic quoque sunt leges, sunt et praecepta, sed illis
446 non nimis astrictum legibus esse volo,
447 nec tamen audacter jubeo violare, quid ergo ?
448 Ut semper maneat inter utrumque volo.
449 Littera nominibus nonnumquam dempta venustis,
450 aptior est multo quam fuit ante, jocis,
451 addita nonnumquam placet, et lepida arte probatur,
452 non sine praescripta condicione tamen.
453 Saepe etiam in lepidis mutatur syllaba dictis,
454 saepe etiam verbo syllaba dempta placet.
455 Quis negat esse jocum ? Cum dicitur aptus arando
456 nominis orator proximitate sui ?
457 Vertitur hic vocis sonus, et natura, decusque
458 inque alium migrat quam fuit ante statum.
459 Nomine sic medicus poterit mendicus haberi,
460 Irus et inverso nomine Cyrus erit.
461 Vidi ego qui placidus memorabile nomen habebat,

462 ut versa est acidus syllaba, dictus erat.
463 An male detortis amentem vocibus illum
464 dixeris, omnino qui furiosus amat ?
465 Et facili fiet studio, nulloque labore,
466 unica mutetur littera, risus erit.
467 Tantane de summo tibi nata potentia caelo ?
468 Aut Jovis imperio littera parva tibi est ?
469 Tu superas variis mutatum Protea formis,
470 ipse etiam inferior Polypus arte tua est.
471 Ille potest vario sese mutare colore,
472 sunt habitus varii corporis inde sui.
473 Tu facili ratione potes, vitamque statumque
474 et formam nullis non variare modis.
475 Fit subito si tu cupias, ex divite pauper,
476 fit subito magnus qui modo parvus erat.
477 Sicut es, in nostro tu pars eris una libello,
478 te semper multo laudis honore colam.
479 Scilicet ut reddas mutato in corpore formam,
480 restituasque iterum quod fuit ante decus.
481 Non tuus hic ludus, seu transformatio rerum,
482 saepe jocosa fuit, seria nulla fuit.
483 Tu quoque Cecropii juvenis studiose leporis
484 hanc cole, et his dignam versibus esse puta.
485 Atque ubi culta satis fuerit, si culta placebit
486 ulterius studio progrediare tuo.
487 Nomina finge suis bene convenientia rebus,
488 nec tantum efficiat littera sola jocum.
489 Nomina facta placent, dictus pro divite pauper
490 impositoque alio nomine risus erit.
491 Fac hunc Alcidem, fac illum Thesea magnum,
492 fortis in infernis vallibus iste fuit.
493 Hic est dic Orpheus Cithara qui ludere novit,
494 ille canens fidibus doctus Arion erit.
495 Ille vel ille alii, nam plurima nomina possunt
496 egregia effingi, sin minus, apta tamen,
497 sic vafer ingenio poterit vulpecula dici,
498 Euclio qui nummos numinis instar habet.
499 Eloquio clarus culto facundus Ulysses,
500 justus Aristides dictus amator erit,
501 sexcentis aliis poteris facundus haberi,
502 et praesens tempus milia multa dabit.
503 Quid queat ambiguus in vocibus esse leporis,
504 quid possit dubitans "amphibolia", vide.
505 Quid valeant lepidis conficta aenigmata verbis,
506 in quibus ipse jocus seria multa tegit.
507 Quid referam veterum clarissima dicta Sophorum ?
508 Quae sunt in sensu pulchra faceta gravi.
509 De quibus egregius numquam moriturus Erasmus,
510 eximio studio condidit auctor opus.
511 Hinc aliquis referens vel bis duo verba jocando,
512 saepe habitus magno dignus honore fuit,
513 sunt etiam multa celebrata proverbialia laude,
514 quae tibi pulchra satis lingua latina dabit.
515 Oedipodes tibi sunt, quicumque aenigmata solvunt,
516 ingenioque vident qui tua dicta suo.
517 Sin minus hoc liceat, sua conjectura placebit

518 cuilibet, et risus omnibus illa dabit.
 519 Multa jocosa etiam sermone latentia tecto
 520 dicimus, et variis conjicienda modis.
 521 Saepe etiam terrere minis, promittere verbo
 522 est jocus, et pulchri signa leporis habent.
 523 Non ea sub nostras veniunt tamen omnia leges,
 524 monstratrix tantum nostra Thalia fuit.
 525 Hoc moneo tantum, salibus mediocriter uti,
 526 et certum possis imposuisse modum.
 527 Tullius hoc olim vitio fuit ipse notatus,
 528 quod nimis in salibus luxuriosus erat.
 529 Haec meminisse decet, certe meminisse juvabit,
 530 scilicet exemplo cautior esse potes,
 531 tunc bene desinitur, cum lusus pulcher habetur,
 532 cum placet et lepidus dicitur esse jocus.
 533 Sicut cum tenero sunt omnia grata palato,
 534 tum stomacho, prodest quam cupit esse minus.
 535 Quod nisi servetur modus hic quoque in arte jocandi
 536 displicet, ingenuis qui fuit ante, jocus.
 537 Nec placet illius ratio vel honesta jocandi,
 538 qui semel in partem criminis inde venit.
 539 Inde cavere decet, ne cui moveatur amico,
 540 ex salibus fluitans nausea forte tuis.
 541 Plura tibi longum sunt observanda per usum,
 542 ille artem facilem qui tibi reddat, erit.
 543 Ille manus habiles reddit, fidibusque canoris
 544 applicat, artificem protinus ille facit.
 545 Tu quoque fac usu vincas incommoda mentis,
 546 et mea non tardo pectore scripta legas.
 547 Meque tuum vatem, et fidum profiteri magistrum
 548 qui, quaecumque dedi, non nisi plana dedi.
 549 Quod si persuasum fuerit tibi, teque putabis,
 550 multa magisterio discere posse meo.
 551 Sic docuisse alios mea Musa putabit, ut inde
 552 grande operae pretium se retulisse sciat.

DE ARTE JOCANDI, LIBER TERTIUS.

J_3 v.1 Hactenus (ut nullo capta est novitatis amore)
 2 et rudis et simplex nostra Thalia fuit.
 3 Quandoquidem rudis est cui scribimus ista jocando,
 4 et rudibus tantum quae damus, illa damus.
 5 Quis modus, et quae sit ratio, sermone jocandi,
 6 diximus, haec primum meta tenenda fuit.
 7 Jam superest nobis coepti pars magna laboris,
 8 lassaque vix medium Musa peregit iter.
 9 Ad nova, qui novus es, nunc te certamina miles.
 10 Ire volo, et nova sunt castra petenda tibi.
 11 Vos iterum Charites precor aspirate canenti,
 12 quod cano, de vestris laudibus omne canam.

13 Vos mihi propositae, ductus sequor ordine vestros
14 Thesea veluti fila ligata manu.
15 Sancta precor tenuem nunc in penetralia vatem
16 ducite sit vestras fas adisse domos.
17 Vestibulum primum sacrataque limina vidi,
18 limina divino carmine digna cani.
19 Nunc pergo ulterius, modo sit progressus ad ipsa
20 concessus sedes, et via plana mihi.
21 Vos monstrate viam qua semita ducat euntem,
22 vestrum opus est artes excoluisse bonas.
23 Fallet : an hic circum mihi nunc florere videntur
24 omnia, et ornatae sese aperire fores.
25 Certe equidem patet introitus Charitesque vocata
26 adsunt, nosque ultra sub sua tecta vocant.
27 I juvenis mecum, sacrataque tecta subintra,
28 cujus Pieridum pectora tangit amor.
29 Qui tenet et didicit facilem quaecumque leporem
30 efficiunt, scriptis non eget ille meis.
31 Acriter ad palmae per se qui currit honorem,
32 illi non opus est addere calcar equo.
33 Non opus est stimulis agitare ad aratra juvencos,
34 qui dant servili subdita colla iugo.
35 Dic, an ei monitis qui sponte movetur ? An illi
36 consiliis opus est, qui satis ipse sapit ?
37 Sed quia perfectum, vel ab omni parte beatum
38 rebus in humanis nil satis esse potest,
39 crede mihi et summis rerum discenda magistris.
40 Longa dies aevi milia multa dabit.
41 Artifices discunt, et iis quae discere possint
42 plurima suppeditat tempus, et hora frequens.
43 Fertur ab indoctis didicisse insignis Apelles
44 et laudem ingenii postposuisse sui.
45 Multa licet teneant docuit quos longior usus,
46 non piget invalidos discere multa senes.
47 Est vitium nescire, sed est didicisse voluptas,
48 omnibus ingeniis convenit istud opus.
49 Ergo aliquis recte dicetur ineptus ab illo
50 crimine, quod sese cuncta tenere putat.
51 Sic poterit forsitan, qui nulla excultus ab arte est
52 iudicio Musis doctior esse suo.
53 Sed valeat propriae qui laudis amore tenetur,
54 discipulus certe non erit ille meus.
55 Cui mea Musa placet, qui te non scire fateris,
56 omnia, tu semper carmina nostra legas.
57 Quod si pauca tenes, animoque priora notasti
58 haec praecepta labor discere nullus erit.
59 Quando quidem jactata valet sententia vulgo,
60 dimidium facti qui bene coepit habet.
61 De causis quibus est pulchrum in sermonibus uti,
62 si praecepta tenes tradita multa tenes.
63 Quae tamen ut noris certe non omnia nosti,
64 restat adhuc aliud quod mediteris opus.
65 Non modo Cecropius lepor in sermone probatur,
66 tenditur, et multo latius ille patet,
67 scilicet et scriptis laus est bene posse joculari,
68 nec minus hic salibus qui velit ille valet

69 hac quoque praeceptis aliquod te parte docebo,
70 ut prius, hic etiam meta tenenda tibi est,
71 hanc ego quam primam studio, perdiscere partem,
72 certe operae pretium grandius esse puto.
73 Scripta etenim ingenii nostri sunt major imago,
74 et referunt certis pectora nostra notis.
75 Adde quod in scriptis nec libertate jocandi,
76 nec quavis uti condicione licet.
77 Verba volant instar paleae, pennaque volantis,
78 quam subito volitans per mare ventus agit.
79 Saepe aliquod dictum patulas praetervolat aures,
80 quod quicumque legit mente tenere potest,
81 nempe ea quae tarde sunt lecta tenacius haerent,
82 inque animum facile est haec revocare tuum.
83 Quae sunt scripta manent et longo tempore durant ;
84 in ventos abeunt omnia verba leves.
85 Ergo aliud studium, quod scilicet omnia vincat,
86 major et hic nunc est cura adhibenda tibi.
87 Est tamen haec etiam parti cognata priori
88 altera et alterius semper egebit ope,
89 hos juvenis moneo conjunctim disce libellos,
90 et subeant animo verba priora tuo.
91 Non ego nunc eadem repetam, quia prorsus inanis
92 in nostro versu tautologia foret,
93 ipsum opus aggredior, lepide praecepta jocandi
94 carmine seu prosa, pauca sed apta dabo.
95 Si tua, quod multi faciunt, commune legentum
96 edita iudicium scripta subire velis.
97 Materiam scripti primum reperire labora,
98 quae bene Cecropiis competat acta jocis,
99 hanc facile est reperire tibi cum postulat usus
100 quaerere non opus est, tempus et hora dabit,
101 seu minus, atque jocos rerum gravitate vel ipsa
102 materia praegnans non patietur opus.
103 Quid facias quaeris ? Libeat spectare quod obstat,
104 materiae ratio est semper habenda tibi.
105 Inspice res ipsas, et causas inspice rerum,
106 omnibus haec statuas anteferenda jocis.
107 Nulla faceta juvant inconvenientia rebus,
108 atque a materia nulla aliena placent.
109 Si cognata tamen cognatis quaelibet addas,
110 forsitan erit scripti causa probata tui.
111 Non ita, quin liceat causas mutare jocandi
112 astrictum nostris legibus esse volo
113 addere res alias aliis quandoque licebit,
114 addere verba jocis proxima quaeque suis.
115 Nam nihil est ulla quod scribi possit in arte,
116 sic de doctrinis scribere nemo potest.
117 Ut non inveniatur suavi satis apta lepore,
118 et res est lepidis verba probata jocis.
119 Dic mihi num poterit prohibere Sophia lepores ?
120 Si fuerit scripti causa Sophia tui ?
121 Num medicina vetat ? Num lata scientia juris ?
122 Quid vetat in numeris Naso poeta tuis ?
123 An vetat aetheriis cui clarum nomen ab astris
124 caelestes scrutans, Astronomia, domos ?

125 Nil vetat, in sacris nisi constans Regula scriptis,
126 nil nisi praescriptum te jubet illa sequi.
127 Quo magis a salibus, cum scribis sacra, profanis,
128 nam decet, et rectum est, abstinuisse velim,
129 non quia non fas sit sacris miscere lepores,
130 quodque sacra Idaliis sint inimica jocis.
131 Sed quoniam varios referunt haec saecula mores,
132 scribere quis variis moribus apta potest ?
133 Quam facile est animum verbo offendisse legentis ?
134 Quam facile est salibus posse nocere tuis ?
135 Vivere quem dicas, quin sit reprehensus ab illis,
136 vipereo quorum pectora felle madent ?
137 Cujus ab invidia non carptos esse libellos
138 credibile est ? Quem non hae tetigere faces ?
139 Saepe aliis quibus est sincero in pectore candor.
140 Siqua placent, aliis displicuisse vides.
141 Sic animi variant hominum, nec opinio mentis.
142 Immutata diu, quae fuit ante, manet.
143 Cernis ut ingenium planum, moresque sequantur,
144 judicia, et rerum pondere quaeque vacent.
145 Hic ait, admittunt suaves quoque sacra lepores,
146 ille ait, in sacris non nisi sacra decent.
147 Nam vitium est summum sacra admiscere profanis,
148 quod quicumque facit, sacra profana facit.
149 Haec ego non fingo, sed idem res ipsa loquetur,
150 dic mihi quis verum dissimulare potest ?
151 Sunt qui Pierides manifesto crimine damnant,
152 qui sacra non humili quo decet ore canunt.
153 Et quia liberior numeris concessa potestas,
154 Pieridum numeris sacra canenda negant.
155 O reprehensores, Momi fecunda propago,
156 o male iudicium turba secuta tuum.
157 Haud mihi difficile est tibi respondere, nec istud
158 non ex propositi condicione mei.
159 Quid vetat Aonides sacris adhibere canendis ?
160 Quid vetat et numeros sacra tenere suos ?
161 An gravitas quae rebus inest ? Et noscitur flecti
162 versibus ad faciles verba sacrata modos ?
163 Falleris et vanis motus rationibus erras,
164 scilicet absurdum quilibet error amat.
165 Hic tibi gentiles quoque contradicere noris,
166 qui bene perspectum non habuere Deum.
167 Pindarus, in lyricis tribuit cui Graecia palmam,
168 Pierides primum vult celebrare Deum.
169 Nam quia divinos scribenda ad carmina motus,
170 excitat ipse animis qui regit astra Deus.
171 Ingenii vires merito conferre poetas
172 ad celebranda Dei nomina sancta decet.
173 Nataque divinis, laudandis carmine rebus,
174 debet in officio Musa manere suo.
175 At levis est, dicis plerumque nec abstinet unquam,
176 nugaci linguae garrulitate suae
177 nec levis est semper, nec garrula, saepe probatur,
178 cum levis est, nec ab hoc crimen habere potest,
179 si levitas vitium est semper, pars maxima vatum
180 est levis, et vitio non caret illa suo.

181 Musa levis fateor saepe est, et garrula saepe,
182 nec sibi figmentis displicet illa suis.
183 Sed nisi scurrilis levitas, si nulla reperta est,
184 sic levitate caret, garrulitate caret.
185 Non levis ergo fuit, nec garrula Musa reperta est,
186 sed potius dicam Musa jocosa fuit.
187 An vitium est etiam, si dicitur esse jocosa ?
188 Ah pereat lepidos qui negat esse jocos.
189 Frigidus huic nimium est circum praecordia sanguis,
190 et jacet in duro pectore dura silex.
191 Ille etiam in caelo Phoebum splendere negabit,
192 et terram motus dicet habere suos.
193 Gnaviter ut sit enim perfrictae frontis oportet,
194 qui semel in rebus desiit esse pudens.
195 Sed neget ille Deum, neget alti lumen Olympi,
196 telluremque neget, sidera clara neget.
197 Nil moror haec, neque quem talis dementia cepit,
198 huic homini stulto carmina nostra damus.
199 Ille suos adeat Momos, petat inde quod optet,
200 se nihil in Musas juris habere sciat,
201 nec tamen insanis hic respondere valebam,
202 et nihil hic prodest perdere verba mihi.
203 Ergo ad te redeo, cui Musa jocosa probatur,
204 quodque nequit merito displicuisse, placet.
205 Hic jam quae mea sit sententia certa, videbis,
206 forsitan et menti congruet illa tuae.
207 Principio ut rebus divinis nata Thalia est,
208 sacra canens, apte, quae canit, illa canit.
209 Ac licet ad certas astricta sit undique leges,
210 dum canit ad numeros sacra ligata suos,
211 attamen ingenuos illi aspersisse lepores
212 et licet et fas est, causa nec ulla vetat.
213 Sed minus ut vaga sit, quantum solet esse, fabellas,
214 libera cum vena liberiore canit.
215 Et facile est illi se continuisse, nec umquam
216 in numeris sibi non constitit illa suis.
217 Non moror hic vario pollutos crimine vates,
218 qui cupiunt versu laedere quemque suo.
219 Semper abutuntur divinis artibus illi,
220 Musaque iis vitio commaculata placet.
221 Sed nihil inde trahit vitii (nihil haeret in illo
222 criminis) Aonidum, turba verenda, chorus.
223 Detestandus erit certo qui crimine damnat,
224 quae sunt de rebus carmina scripta sacris
225 quique negat, sacris adhiberi posse canendis,
226 ingenuis umquam verba faceta jocis.
227 Ista superstitio, quod res sit vana, probamus,
228 et quid enim tali vanius esse potest ?
229 Dicimus, et sacris fas est aliquando lepores
230 addere, sed certa condicione tamen.
231 Scilicet ut scripti lascivia carminis absit,
232 nec faciat nimius sacra profana jocus.
233 Impia quod faciunt quorumdam carmina vatium,
234 qui sacra infandi criminis instar habent.
235 Et subsannantes pietatis nomina rident,
236 hoc immortalem est spernere velle Deum.

237 Ergo ubi sacra canunt, sese cantare fabellas
238 materia numeris conveniente putant.
239 Religio est illis jocus, et nugacia tractans
240 fabula, quae variis flectitur una modis.
241 Sed neque materiam, neque res, sed carmina spectant,
242 ah ! pereant per quos ista Thalia venit
243 et pereat qui non cupit hos damnare poetas,
244 hunc se laturos terra fretumque negent.
245 Quis probet illorum, quis scripta imitanda virorum
246 censeat, ingenuos, ut petat inde sales ?
247 Hoc erat a pleno vitiis Nerone, beate
248 vivendi certum quaerere velle modum
249 sed cui firma manet tendens ad recta voluntas,
250 ille homines tales ceu fera monstra fugit.
251 Ille etiam, suasu virtutis, ad optima fertur,
252 et certe monitis non eget ille meis.
253 Qui tamen addubitas et adhuc in vepribus haeres,
254 carminibus nostris certior esse potes.
255 Sin minus illa tibi sananda ad vulnera mentis
256 sufficiunt, levius scriptaque pondus habent.
257 Inspice doctorum praeclara exempla virorum
258 et faciant certam carmina docta fidem
259 non modo lux verbi et pietas quibus alma reduxit,
260 saecula, laudatos, nostra, tulere viros.
261 Carmine qui celebrent sacri mysteria verbi,
262 atque canant numeris sacra ligata suis.
263 Verum etiam multos tulit aetas prisca poetas,
264 qui coluere pias cum pietate Deas.
265 Et quia sunt vario celebrati nomine laudis,
266 quam nunc de sera posteritate ferunt.
267 Hos tibi ceu veros (moneo) propone Magistros,
268 qui possunt Musas erudiisse tuas.
269 Doctus honorandos cecinit Prudentius hymnos
270 complexus variis nil nisi sacra modis.
271 Illius in templis hoc tempore scripta canuntur,
272 doctorumque hominum semper in ore vigent,
273 mira Euangelion scripsit brevitate Juvenus,
274 crede mihi brevitatis ingeniosa placet.
275 Nostra Cremonensem foverunt saecula Vidam,
276 quem sibi Virgilius dixerit esse parem.
277 Illius in manibus nostris versatur, et exstat,
278 Christiados, merito quod celebratur, opus.
279 Quid sileam ? Dignum praestanti laude poetam :
280 qui fuit Hessiaci lumen et aura soli.
281 Et fuit et nunc est, quis enim non esse putaret,
282 quem pia semideum scripta fuisse probant.
283 Quamvis mortalis spoliatum munere vitae,
284 novimus, at scriptis vita perennis erit.
285 Hunc ceu Germanum, moneo, Germanus Homerum
286 in manibus teneas nocte dieque tuis.
287 Inde venustates, scribens, suavesque lepores,
288 si quod habent pondus carmina nostra, petes.
289 Quod si contigerit minus hunc aequare poetam,
290 ingenio aut venae fertilitate tuae.
291 Frugiferum tamen et multum prodesse videbis,
292 optima principio proposuisse tibi.

293 Hactenus exposui, quae sacris Musa canendis
294 conveniat, brevis hic nostra Thalia fuit.
295 Namque ea res summam curam, studiumque requirit,
296 debet et in sacris rarior esse jocus.
297 Adde quod hic varia est stolidi sententia vulgi
298 omniaque haec nostra latius arte patent.
299 Ergo hic non volui multas praescribere leges,
300 propositi sensus non fuit illa mei.
301 Nec jubeo multum nostris confidere dictis.
302 Sed neque momenti nullius esse putes
303 quaere aliam potius quae competat apta jocando
304 materiam, et lepidis quae sit amica jocis.
305 Finge tuo Marte ipse aliquid, res elige laetas
306 has quacumque voles finxeris arte licet.
307 Sive placet lepidos vati conscribere versus
308 ac inventa suis verba ligare modis.
309 Est sua libertas doctis concessa Camenis,
310 semper et in versu est libera Musa tuo.
311 Non est alterius praescriptum ubicumque sequendum,
312 sed licet interdum finibus ire suis.
313 Sive aliquid scripturus eris sermone soluto,
314 quis dicat lepidos posse deesse sales ?
315 Sicut enim variis mutantur cerea formis
316 corpora, nam digitis res valet apta tuis.
317 Nunc hominis, nunc effigiem designat aselli,
318 nunc piscis, volucris, nunc leo, nunc fit aper.
319 Sic licet in varias scriptum deducere formas
320 quod de te natum est, cujus es ipse parens.
321 Sed tamen ut classes habeas, formasque jocandi,
322 parte aliqua in scriptis nostra opus arte tibi est.
323 Ne velut ignotis erres peregrinus in oris,
324 qui non exactum quo sit iturus habet.
325 Ergo aliquas leges non stricte ubicumque sequendas.
326 Praescribam, et breviter commonuisse sat est,
327 principio ingenii cupias cognoscere vires,
328 et ratio studii sit tibi nota tui.
329 Denique, si sapias, totam perpendere vitam
330 metirique tuo te velis ipse pede.
331 Crede mihi magnam laudem et memorabile nomen
332 omnibus in rebus "gnothi seauton" habet
333 et facile efficere est ut sis tibi notus, id ipsum
334 vita homines cunctos quotidiana docet.
335 Quid tamen hoc prosit, quaeris ? Praeceptaque forsan
336 quae minime prosit discere, parva vocas.
337 Parva quidem fateor, sed deducuntur ab illis
338 maxima, de parvis grandis acervus erit,
339 si bene te noris, ratione jocaberis illa
340 qua decet, et salibus sponte disertus eris.
341 Id fiet si materiam tibi sumpseris illam
342 quae sit, ut esse decet, viribus apta tuis.
343 Sponte tibi obvenient, quae scribas grata legenti
344 plurima, nec paucos res dabit ipsa jocos.
345 Si medicus doctam profiteri Machaonis artem,
346 et non, laudata prorsus ab arte rudis.
347 Offeret ipsa tibi pulchros medicina lepores
348 illa potest verbis addere verba tuis.

349 Scilicet excuties et singula quaeque notabis,
350 accedet numero copia magna tuo.
351 Et quod enim melius quam quae sibi cognita scribet,
352 quando ea quae nescit scribere nemo potest,
353 cui placet et nota est praeclara scientia legum,
354 qui sacri juris cognitione valet,
355 huic varii casus, variae sine pondere rixae,
356 plurima quae scribat verba jocosa dabunt.
357 Scribentemque sui officii audivique monebunt,
358 misceat in scriptis ne peregrina suis.
359 Si tibi Pierides, et eorum scripta probantur,
360 si pia Pegasei numina fontis amas.
361 Ipsa jocos varios ultro dabit, atque lepores,
362 ipsa reget calamum docta Thalia tuum.
363 Nec tamen usque adeo leges astrictus ad illas,
364 ut modus hic non sit transiliendus, eris.
365 Non volo materia semper verseris in una
366 non lepidos semper res dabit una jocos.
367 Et licet, et fas est suaves aliunde lepores
368 quaerere, non istud dicimus esse nefas.
369 Sed quod convenient procul accersita, negamus,
370 haec res ingenio est perspicienda tuo.
371 Disce bonas artes, praestans doctrina probatur,
372 illa tuum calamum non sinet esse rudem.
373 Volve manu crebra veterum monumenta Sophorum.
374 Nam prodest salibus lectio crebra tuis.
375 Perlege et historias et dulcia carmina vatum,
376 volvere scriptorum proderit omne genus.
377 Dixerit hic aliquis, res infinita, nec isti
378 sufficiens ullus forsitan esse potest.
379 Est ita perfecte si quis perdiscere temptet
380 omnia, nec finem est res habitura suum
381 verum ego te jubeo digitis attingere summis
382 optima, quae lepidi sunt alimenta joci.
383 Sicut apes teneros primum depascere rores,
384 postea in alveolis mellificare solent.
385 Elige quae salibus praepollent scripta facetis
386 elige scribendo quos imitere viros.
387 Perspice qui prosa valeat, qui carmine praestet,
388 debet enim studiis neuter abesse tuis,
389 doctiloquus (moneo) placeat tibi semper Erasmus
390 cujus utroque patet scripta sub axe legi.
391 Sunt ea blanditiis et suavi tincta lepore,
392 sunt passim lepidis scripta referta jocis
393 quo libet ista trahunt animos, retrahuntque legentum,
394 ut capiant nullae taedia longa morae.
395 Sicut Apellea depictas arte tabellas,
396 ingenti studio, qui videt, ille videt.
397 Infixosque oculos retinens, miratur et haeret,
398 lustrandique magis tempore crescit amor,
399 haec moveant, ut scripta legens imiteris Erasmus,
400 inde feres studii commoda multa tui.
401 Inde sales discas et res et verba leporum,
402 in scriptis quorum crebrior usus erit.
403 Vatibus a summis suaves quoque disce lepores,
404 disce, sed a doctis, tu quoque doctus eris.

405 Non hos longinquis opus est accersere terris,
406 quin tua permultos Bibliotheca dabit,
407 perlege Nasonis celeberrima scripta poetae
408 scripta per aeternos non moritura dies.
409 Inde venustates, velut ipso ex fonte leporis,
410 ac velut ex cornu liberiore fluunt.
411 Est quoque in Ausoniis laus prima Terentius oris,
412 cui merito palmam comica turba dedit.
413 Ille tibi volvendus erit manibusque tenendus,
414 hoc tibi non alius carior auctor erit.
415 Hunc tibi praecipuum (moneo) propone magistrum
416 ille sit ante oculos nocte dieque tuos.
417 Quaeris, in his quae sit ratio observanda leporum,
418 quaeque sit utilitas inde petenda tibi.
419 Disce ea quae lepidis sunt convenientia scriptis,
420 disce ea quae scriptis sunt imitanda tuis.
421 Quae sit ridiculis sententia tincta figuris
422 quae sint in scriptis mystica verba, vide.
423 Si quid hyperbolice dicatur, id omne placebit,
424 vatibus eximiis convenit iste jocus.
425 Non minor emphatici est animo violentia dicti,
426 saepe joci in scriptis emphasis auctor erit.
427 Et placet assimilata aliis res, si qua venuste
428 additur, et lepidis convenit apta jocis.
429 Quid memorem suaves, plenasque lepore fabellas,
430 addit enim scriptis fabula scripta decus.
431 Quid lepidos versus ? Salibusque jocisque refertos ?
432 Quid tribuam laudis suavibus historiis ?
433 Ut taceam in multis jucunda proverbialia scriptis,
434 in quibus egregius splendor inesse solet.
435 De quibus illa animo repetens ex parte requiras,
436 quae prior hac numero nostra tabella dedit.
437 Illa tuis adhibe scriptis, et consule mentem,
438 plura jocosa dabit forsitan illa tibi.
439 Denique sic adijunge sales, sic adde lepores,
440 propositi ratio constet ut ipsa tibi.
441 Ne, nimium tribuens salibus, videaris inepte
442 non ea quae res sunt ac peregrina loqui.
443 Historias narras ? Non te narrare fabellas
444 cogita, et ex rebus quas canis adde jocos
445 haec animo subeant, memoremque per omnia mentem
446 propositi reddant admoneantque tui.
447 Sit jocus ex rebus ductus, sit idoneus auctor,
448 qui possit calami jura novare tui.
449 Nam si fecundam venam natura negavit,
450 et phrasis ex aliqua parte coacta tua est.
451 Disce jocos, scriptis tempestivosque lepores
452 addere, scribendo vel Theophrastus eris.
453 Et simul erudiunt simul admoneantque legentem,
454 multa etiam possint dissimulare joci.
455 Invidiae non sis pravae temerarius auctor.
456 Nec tua quem libeat carpere scripta velint.
457 Quod si te capiet praecepti oblivio nostri,
458 qua fugias odium nulla relicta via est.
459 Invidiae rursus caecae lacerabere morsu,
460 scriptaque vix ullus quin tua carpat, erit.

461 Nam si divinum detrectans livor Homerum
462 dentibus intactum non sinit esse suis :
463 dic mihi quid mirum ? Si spirans Colchidos herbam
464 conetur libros carpere lingua tuos ?
465 Ergo habeant magnum praecepta levissima pondus,
466 illorum in scriptis maximus usus erit.
467 Diximus, in scriptis qua sit ratione jocandum,
468 si cupis a multis edita scripta legi.
469 Nunc breviter dicam quid littera scripta requirat
470 littera sermonis nuntia facta tui.
471 Firmiter haec animo absentes conjunget amicos,
472 atque homines vinclo proximior ligat.
473 Haec conservat amicitias, conservat amorem,
474 haec facit ut longo tempore duret amor.
475 Si tamen in scriptis servetur ubique decorum
476 littera nec salibus fiat inepta tuis.
477 Nam nisi sit lepidus, nisi tempestivus, et aptus,
478 et nocet, et nostra non valet arte jocus.
479 Saepe simultates, odium, saepe excitat iram,
480 saepe etiam invidiae littera causa fuit.
481 Ergo quibus tandem mittatur epistola, primum
482 cura sit, ingenio posse videre tuo.
483 Inde modus totus debet pendere jocandi,
484 hac omnes stabunt condicione sales.
485 Scribis ad ignotos ? Salium sit parcior usus
486 ludere velle jocis ne videare tuis.
487 Lude sales, caute suaves asperge lepores,
488 si ratio scripti non vetet ipsa tui.
489 Unde petas res ipsa dabit, res ipsa monebit,
490 inspice res ipsas, sponte disertus eris.
491 Nec tamen astrictum rebus neque cedere rebus,
492 inter utrumque magis posse manere, velim,
493 saepe jocos praebere potest occasio scripti,
494 illa potest scriptis addere multa tuis.
495 Saepe jocos locus ipse dabit quo littera missa est,
496 tum quoque causa joci nuntius esse potest.
497 Quid memorem tempus, quid eam qua scripseris horam ?
498 Quid merita officiis extenuata suis ?
499 Denique quid varios casus ? Quid plurima rerum
500 nomina ? Quae nostra latius arte patent.
501 Haec tibi scribenti sunt observanda, nec umquam
502 officii ratio est praetereunda tibi.
503 Nil vetat interdum lepidas narrare fabellas,
504 saepe fuit suavi fabula digna joco.
505 Quod si liberius temptabis scibere quidquam,
506 in numeros coeat littera tota suos.
507 Addere sic multum, sic fingere multa licebit,
508 quae nisi sit carmen littera nulla feret.
509 Quod tamen ignoto scribas non excidat umquam
510 illius imprimis te meminisse decet.
511 Quae nova sunt fugias, consuetaque verba jocando
512 cura sit et salibus pauca adhibere tuis.
513 Sit pudor in verbis, non sint adversa decoro,
514 sic potes ignotum demeruisse tibi.
515 Scilicet ex scriptis aliquis cui mentis acumen,
516 agnoscat mores ingeniumque tuum.

517 Ex salibus si sint lepidi non crimine digni,
 518 ingenuos mores colligit esse tuos.
 519 Sin minus, et nusquam jocus est, aut ulla venustas,
 520 te genitum rabidis judicat esse feris.
 521 Teque tuosque odit mores, quis amaverit illum,
 522 cui non est toto corpore mica salis ?
 523 Ergo etiam ignotis tua littera missa placebit,
 524 si lepidis modice floreat illa jocis.
 525 Si modus, ut dixi, certus teneatur in illis,
 526 si fuerit scripti forma pudica tui.
 527 Verum ubi sincero forsann mittetur amico
 528 littera sermonis nuntia facta tui,
 529 quo tibicumque libet pacto licet esse jocosum,
 530 quicquid ei cupies scribere, scribe jocos.
 531 Omnia namque placent sinceris inter amicos,
 532 quorum non falsus pectora junxit amor,
 533 hic tibi non opus est monitis, sed longior usus,
 534 ostendit multo haec commodiore via.
 535 Sic brevibus saltem monitis docuisse volebam,
 536 pauca ea sufficiunt, et monuisse sat est.
 537 Tu praecepta volens numerum mea cogere in unum
 538 ex paucis tandem magnus acervus erit.
 539 Hunc etiam librum, si non piget, adde priori
 540 fons etenim primus posterioris erit.
 541 Meque tuum vatem (tenuem licet) atque magistrum
 542 dilige, qui ex animo quae dedit, illa dedit.

DE ARTE JOCANDI, LIBER QUARTUS.

J_4 v.1 Ultimus in cursu labor est stagnantibus undis.
 2 Nostra petens portum nunc quoque navis eat.
 3 Hanc tibi non liceat turbare potentibus Austris,
 4 Aeole, quam perdas Dardana classis erit.
 5 Est pluviis inimica, furentibus invidet Austris,
 6 nam semper fragilis nostra carina fuit.
 7 Numina vestra regant, Charites, et ut ante gubernent,
 8 inceptum cursum numina vestra regant.
 9 Hic jam vester honos, hic laus et gloria crescet,
 10 gloria divino carmine digna cani.
 11 Quanta sit utilitas, quis honor, quae cura jocorum,
 12 exponet brevibus nostra Thalia modis.
 13 Disce tuum juvenis qui me cupis esse magistrum,
 14 permultum studio laudis inesse tuo.
 15 Et qui nostra tenes suavis praecepta leporis,
 16 te studio indignum nil didicisse puta.
 17 Hic tibi picturam referam prius, inde probandos
 18 non una dices utilitate jocos.
 19 Qua patet ad Charitum sedes ingressus amandas,
 20 altaque Parnassi sidera tangit apex.
 21 Lignea dissimili variata colore tabella,

22 pendet ad ornatas conspicienda fores.
23 In medio artificii dextra depictus, et idem
24 distinctus geminis partibus hortus inest.
25 Altera pars violis florens herbaque pudenti
26 veris et autumnii signa virentis habet.
27 Hic herbae et frutices, hic sunt dulcissima poma,
28 et sua vix arbor pondera ferre potest,
29 somniferam praebet tener hic quoque pampinus umbram,
30 nec solidas vires ardor et aestus habent,
31 virgineas passim ducentes arte choreas,
32 alternis gaudent saltibus ire deae.
33 Egregii fidibus juvenes citharaque canentes
34 suavisonis cantant carmina facta modis.
35 Una alias virgo reliquas supereminet omnes
36 laetitiae adscriptum (sic puto) nomen habet.
37 Hic hymenaeus adest, qui mutua foedera jungit,
38 et fidibus Paeon dulcibus ille canit.
39 Sunt Musae et Charites, studium quibus omnibus unum
40 pectora Cecropiis exhilarare jocos.
41 Quid memorem varios cantus ? Modulosque sonantes
42 quid varios plausus laetitiaeque modos ?
43 Quid multis ? Uno complectar ut omnia verbo
44 omnia sunt studiis, omnia plena jocos.
45 Altera distincti pars non est fertilis horti,
46 gramina cuncta istic arida facta jacent.
47 Perpetuo veluti quodam languentia somno
48 omnia nil dignum quod celebretur, habent.
49 Omnia quo te cumque refers pallentia cernis,
50 et folia arboribus plane inimica suis.
51 Hic dolor et luctus, facies hic Stoica regnat,
52 invisis facies torva superciliis.
53 Quid dicam ? Nihil hic laeti est, neque cernitur ullus
54 cui sit in immenso corpore mica salis.
55 Hic ibi Apelleo tibi sunt depicta colore,
56 artificii ut videas omnia picta manu.
57 Addita non paucis est explanatio verbis,
58 illa docet pulchrum quod tibi formet opus.
59 Vita duplex gemini sub imagine pingitur horti
60 attribuit veras pictor utrique notas.
61 Altera quam pavidis curis vitiisque necesse est
62 altius humanis exseruisse caput.
63 Scilicet a strepitu vulgi et clamore remota est
64 ac placida semper pace quieta manet.
65 Convenit haec illis quibus est didicisse voluptas,
66 quique piis Musis nocte dieque vacant.
67 Sic tamen ut studium quandoque remittere temptent,
68 otiaque interdum non inhonesta sequi.
69 Nam decet et licita est alterna remissio Musis,
70 alternam requiem qui studet omnis amat.
71 Sic, donec licuit, quibus aevo contigit uti,
72 vita carens strepitu vatibus acta fuit.
73 Credibile est illos tranquillae tempora vitae,
74 fortuna cunctis praeposuisse bonis.
75 Pierides Naso Paelignae gloria gentis,
76 praeposuit gazis, Croese superbe, tuis.
77 His olim varios sibi conciliavit amicos

78 nunc laudem serae posteritatis habet.
79 Plurima scripta jocos variis ornata reliquit,
80 quae sunt perpetuo non moritura die.
81 Quid memorem, Romane, etiam tua scripta, Tibulle ?
82 Quid laudem ingenium, docte Catulle, tuum ?
83 Sic etiam Andinus vates, sic vixit Homerus,
84 qui cecinere suis Troia bella modis.
85 Horrida bellandi saevique pericula Martis,
86 res gravis et lepidis plane inimica jocos.
87 Qui tamen haec ab iis versu descripta videbunt,
88 dicent in media est hic gravitate jocus.
89 Nam voluere quidem jucunda legentibus essent
90 ut fierent lepidi tristia bella joci.
91 Adde quod interdum posita gravitate canendi
92 carminibus dulces lusit uterque sales.
93 Ludicra cum ramis murum descripsit Homerus
94 proelia, quae lepidis res magis apta jocos ?
95 Pastorum facili noster Maro lusit avena,
96 materia salibus conveniente suis.
97 Quid moror in vatibus studiis ? Musa ipsa poetas
98 et regit, et pellit, nec sinit esse ferus.
99 Ipse etiam eloquii verus pater unus et auctor,
100 quid melius dulci censuit esse joco ?
101 Cui licet haud levibus peragenda negotia curis,
102 et fuerit tanti cura tenenda fori.
103 Musa tamen placuit, fuit haec recreatio vitae
104 huic studii cupidus tempora multa dabit.
105 Omnibus haec doctis placet, et ratio omnibus una est
106 pectora Cecropiis exhilarare jocos.
107 Pectora, quae nimio studii defessa labore,
108 nil melius studiis, quo recreentur, habent.
109 Non aliter quam si telum quem fixit acutum
110 scorpius, et morti damna propinqua dedit.
111 Utitur his ipsis qui jam nocuere venenis,
112 et petit ex illo qui modo laesit opem.
113 O fortunatos quibus haec medicina paratur,
114 et licet hac vitae commoditate frui.
115 Altera quam pingit locus alter inutilis horti,
116 vita, carens salibus Stoica dicta manet.
117 Haec gravis, haec semper multis obnoxia curis
118 permanet, ac torvis plena superciliis.
119 Convenit haec Cynicis, morosis omnibus illis,
120 qui sibi non ipsis vivere turpe putant.
121 Cognitione hominum quae sunt dignissima tractant,
122 atque suum studium nobilitate probant.
123 Omnia sed tenebris studio est involvere caecis,
124 mens illis suadet non nisi vana sequi.
125 Inde ea quae fuerant jucunda legentibus olim,
126 immundo reddunt omnia plena situ
127 certa in iis gravitas odiosa et taetrica regnat,
128 dispereant quibus haec Stoica vita placet.
129 Hanc duplicem gemina demonstrat imagine vitam,
130 quae modo descripta est picta tabella tibi.
131 Altera praefertur quae vatibus optima visa est
132 emicat et vario est dignior illa gradu.
133 Et quanto est melior brumae laudabilis aestas

134 tanto haec vita manet mobilitate prior
135 est eadem veterum sententia dia sophorum
136 et sunt iudicio congrua scripta meo.
137 Inde, hominum vitae ceu condimenta quod essent,
138 dicebant, vocis nobilitate, sales.
139 Scilicet istorum contingit munere, quicquid
140 (sic dixere) hominum vita saporis habet.
141 Nam si perpetuis sint cuncta obnoxia curis,
142 atque aeterna animos sollicitudo premat,
143 si tenerae non sit quaedam recreatio vitae,
144 et capiti perstet nil nisi triste tuo,
145 vita aliud est quid gelidae nisi mortis imago,
146 et miseranda animae carnificina tuae ?
147 Ne diuturna putes quae nullo tempore cessant
148 alterna requie quod caret, omne perit.
149 Haec bene praevidit caelestis conditor orbis,
150 cujus vertuntur regna ducesque manu.
151 Temporis inde vices, partesque volubilis annis
152 constituit sapiens ordine quaeque suo.
153 Aestatemque hiememque dedit, mutataque caeli
154 sidera, nec dubiis facta elementa locis.
155 Inde suam exspectant animalia cuncta quietem,
156 temporaque in somnis certa laboris habent.
157 Tunc omnis cessans a vomere libera terra est,
158 lux nova solstitii quando hiemalis adest.
159 Arboribus quoque tunc requies contingit et herbis,
160 et, breviter dicam, tota quiescit humus.
161 Falciferae cessant brumali tempore vitae,
162 atque illo requiem tempore Bacchus amat.
163 Non sentit tumidos fluctus, ventisque procellas
164 aequoris in placidis tuta carina vadis.
165 Hoc quoque consilio divinus rector Olympi,
166 constituit noctem constituitque diem.
167 Illa quidem ut requies cunctis vescentibus aura
168 aetherea, haec operae cuilibet apta foret.
169 Quis dubitat gratam mortalibus esse quietem,
170 quo nihil utilius corpus habere potest.
171 Illa novat vires, et justo membra labori
172 apta facit, solitum restituitque decus.
173 Perpetuo nullus quantumvis robore praestet,
174 nec dormire potest nec vigilare potest.
175 Ipsa hominis requiem quandam natura requirit,
176 et cessare homines illa aliquando jubet.
177 Audacem juvenis linquit persaepe palaestram,
178 et recreat certis bracchia fessa modis.
179 Non semper bellator erat, bellator Achilles,
180 interdum lepidi carminis auctor erat.
181 Saepe etiam posuit praegrandi pondere clavam
182 qui manibus domuit monstra tremenda suis.
183 Omphalium tenuit persuasus pollice fusum,
184 et muliebri adeo nobilitavit opus.
185 Si tantis optata quies heroibus olim
186 et fuit, atque aliter non potuisse liquet.
187 Si labor assiduus nec cessans actio, multis
188 res optanda quidem, non toleranda fuit.
189 Quid tu perpetuis curis, multoque labore

190 sufficias ? An non Hercule major eris ?
191 Nec tamen hic vires summumque in corpore robur,
192 aestimo, longe aliud corpore majus habes.
193 Est animus ratione valens, qui corpori inhaeret,
194 et facit, ut brutum dicere nemo queat,
195 sustinet ille quidem multo majora, nec illi
196 pondera qua numeret, sufficit ulla dies.
197 Semper habet quod tractet opus, semperque laborat,
198 semper agit, sensu non nisi nocte vacat.
199 Idque homini cui Musa placet, studiumque bonorum,
200 et patet, et multo notius esse potest.
201 Namque omnes superat studii meditatio curas,
202 discendi ingenium grande fatigat opus.
203 Non ibi languescunt (quamvis minuuntur ab illo)
204 quas vires hominis corpus habere potest.
205 Non manus hic callo durata obducitur ullo,
206 nec pedibus morbus nascitur inde tuis.
207 Ipsa tibi cujus contingit munere sensus
208 vita quiete carens debilitata perit.
209 Inde animi multos spoliari sensibus olim
210 vidimus, et vitae parte carere suae.
211 Vidimus et furiis agitari, et mente carere,
212 hic furor ex studiis non aliunde venit.
213 Non tamen haec Musis culpa assignatur, et ipsis
214 artibus, haud quicquam Musa furoris habet.
215 Sed quia quae studiis adhiberi debuit, illis
216 grata negata quies sensim abiisse liquet.
217 Quo magis o juvenes Musis quicumque studetis,
218 esse aliquid lepidos quaeso putate jocos.
219 Et quia fessa suam requiem natura requirit,
220 qua sine non animus qui fuit ante manet.
221 Crede equidem lepidosque sales suavesque lepores
222 semper id esse animo quod medicina tuo.
223 Quandoquidem studii recreatio certa, lepores
224 ac veluti vitae sunt alimenta tuae.
225 His variae curae luctusque dolorque fugantur,
226 nulla animum torquens sollicitudo manet,
227 quam multi ante diem misere periere supremum ?
228 Et Stygii exanimes regna adiere dei ?
229 In promptu causa est, medicina haec defuit illis,
230 nec licuit tanta commoditate frui.
231 Et quid adhuc causam mortis miramur in illis ?
232 Quidve recens mortis credimus esse genus ?
233 Tempore consumi lapides ferrumque videmus,
234 hoc dubitas animo durius esse tuo ?
235 Tempore magnae urbes labuntur et oppida multa
236 longa dies etiam durum adamanta terit.
237 Quid mirum si languescunt in corpora vires,
238 atque hominum fragilis tempore vita perit ?
239 Haec mihi scribenti, veniens sic Parca locuta est
240 (vidimus et Lachesin arguit ipsa colus)
241 jam scio te nostros culpantem voce labores
242 dicere nos duri pectoris esse Deas,
243 quid juvat innocuas sceleris damnare ? Quid illas
244 spernere, quas voluit Juppiter esse deas ?
245 Atque adeo a multis (cum sim sine crimine vitae)

246 cur toties verbis carminibusque petor ?
247 Me culpant reges, me plebs, puerique senesque
248 nemo tamen merito quod reprehendat, habet.
249 Cuncta potestati nostrae subjecta fatentur
250 subjectum mundum legibus esse meis
251 nec tamen est (nisi cuncta illi subjecta fatemur
252 quae fortis propriis viribus esse nequit)
253 multa olim memini mihi gloria, splendor, honores,
254 egregium nomen saecula priora dabant.
255 Non ita regnabant, quae nunc dominantur in orbe,
256 ebrietas, luxus, bella cruenta, neces.
257 Non Venus aut validum frangebatur pectora vinum,
258 rarus et in bello qui cecidisset, erat.
259 Non animum curae, non sollicitudo premebat,
260 omnis avaritiae nescia turba fuit.
261 Ergo animo vires, firmumque in corpore robur
262 mansit, et infractum saecula multa stetit.
263 Saepe aliquis, viridi meminit quam gramine quercum
264 vidit in aequaevum consenuisse nemus.
265 Saepe aliquis numerans jucundae tempora vitae,
266 saepe aetas validum tertia vidit avum.
267 At cum degenerare homines coepere, suique
268 immemor, et vitiis dedita turba fuit.
269 Vita brevis tenerum valido sine robore, corpus
270 contigit, haec hominum non mea culpa fuit.
271 Saepe meum tenui gestantem pollice fusum
272 jam vix inceptum Mars mihi rupit opus.
273 Saepe homines ipsi, dum in mutua vulnera tendunt,
274 ruperunt manibus fila tenenda meis.
275 Nunc etiam abbreviant multi sibi tempora vita
276 et sunt interitus causa propinqua sui.
277 Et tamen haec miseram, veluti me culpa nocentem
278 obruit, atque ream criminis esse facit.
279 O non aequa meo mortalis turba labori,
280 o male iudicium turba secuta tuum.
281 Saepe mihi interitus, pueri, juvenisque, senisque
282 qui cadit ante diem, vulnera magna facit.
283 Imo equidem quicumque Stygis descendit ad undas
284 crede mihi haud nostris legibus ille perit.
285 Est Deus, est rerum dominus, qui fila gubernat,
286 qui nostras quo vult pertrahit ipse manus.
287 Saepe quidem varios nobis facit ille dolores
288 si quem forte mori jusserit ante diem.
289 O quam saepe equidem rupturam fila negavi,
290 ipsaque tam durum dextra negavit opus.
291 Hinc Eobane mihi nuper miseranda dedisti
292 tempora docta nimis flere, dolore, queri.
293 Hei mihi, quam volui pro te succumbere morti,
294 et quam saepe animo sum mihi visa mori !
295 Nec licuit, Superum stetit immutata voluntas,
296 jussit et omnipotens frangere fila Deus.
297 Res mihi nota quidem nec mortis causa latebat
298 quis dubitat ? Summus causa erat ipse Deus.
299 Praeripuit mundi te casibus ille futuris,
300 instanti voluit praeripuisse malo.
301 Ne, ventura hominum quae sunt mala damna, videres

302 et mala, quae Christum turba secuta feret.
303 Nunc fortunatus tranquilla in pace quiescis,
304 et spernis summi totius orbis opes.
305 Haec non invideo tibi, nec lugenda putabo
306 tristitiae hinc longe est causa remota meae.
307 Me scio damnabunt vates tua fata canentes
308 et mea quae non est, culpa futura mea est.
309 O utinam toties quoties optabo, liceret
310 parcere, quam vellem nomen amare meum.
311 Sed quid iis liceat, quibus ipsum vivere mors est :
312 et quibus interdum vita negata fuit ?
313 Vivere posse tamen, vitam dedit ipse perennem
314 Juppiter, o si non perpetua illa foret.
315 Perpetuas hominum voluit Deus esse ministras,
316 nec poterit finem noster habere labor.
317 Nocte dieque manet praegnans in pollice fusus,
318 et sunt non uno fila trahenda modo.
319 Saepe quidem labor est uno renovandus in anno,
320 atque novas curas quaelibet hora facit.
321 Nunc aliis iterumque aliis pereuntibus, unam
322 frangere nunc cogor, nunc reparare colum.
323 Sed neque qui pereat, neque qui periturus in orbe est
324 novimus, haec soli est res bene nota Deo.
325 Dixerat et tenues fugiens ceu ventus in auras
326 addidit haec verbis ultima verba, vale.
327 Mox audita animo mecum pervolvere coepi
328 et res iudicio est tota probata meo.
329 Quod si me nullis credis rationibus usum,
330 iudicio stabunt non minus illa meo
331 sunt mihi tercentum, nec sunt sine pondere causae
332 ipsaque res testis certior esse potest.
333 Inspice res hominum, varie confusa videbis
334 omnia, nec veterem qui fuit ante statum
335 invenies multos variis rationibus ipsos
336 plus nocuisse sibi, quam nocet ipse Deus.
337 Hunc animi curis, istum sine mente bibendo,
338 atque alios aliis interiisse modis.
339 Sed quae stultitia est hominum ? Sibi sponte nocere
340 et quae stultitia est, sponte perire sua ?
341 Qui te posse frui dedit ipso munere vitae,
342 qua tandem dederit condicione, vide.
343 Ut prodesse aliis posses, aliosque docere
344 hac vitae munus jussit habere Deus.
345 Ergo animum ut fessum recrees, aliquando joculari
346 et licet, et fas est, et Deus ipse jubet.
347 Hoc monet utilitas vitae, ratioque decori
348 postulat, id certe non violare decet.
349 Summus Aristoteles vocat incivilia corda,
350 in quibus est numquam mica reperta salis.
351 Et Plato Xenocratem, cum vultu Stoicus esset
352 jussit Pieriis sacrificare deis.
353 Haec tibi si forsan, juvenis, leviora videntur
354 quam quibus hoc tribuas, quod tribuisse decet
355 natus es e scopulis et saxis durior ipsis,
356 durius infracto cor adamante geris.
357 Sed puto iudicii jam te gravitate moveri,

358 inque animo verbum pondus habere tuo.
359 Nam quia vivendi ratio monet ipsa, quid obstat
360 quo minus ut debes haec mea dicta probes ?
361 Non mea sunt, nec enim poteris nostra esse putare
362 ipse tibi sensus talia verba dedit.
363 Dic mihi quid fueris nisi pondus inutile terrae ?
364 Si tibi cum sociis vita negata foret,
365 si tibi cum nullo penitus vivente loquendum,
366 consuetudo hominum sit fugienda tibi.
367 Id fieri res ipsa docet, quae regula vitae est,
368 quae placeant aliis dicere nulla queas.
369 Qui studet ut scriptus multum sit et ore venustus
370 non petulans, audax, turpis et ore loquax
371 dic ubi non placuit ? Nec conciliavit amicos,
372 dic ubi non multis gratior ille fuit ?
373 Vincere sive placet jucundos inter amicos
374 atque animos lepidis exhilarare jocis.
375 Sive apud ignotos variis peregrinus in oris
376 vixerit, optatus cuilibet hospes erit.
377 Denique quicquid aget tandem, quaecumque loquetur,
378 non poterit dictis fautor abesse suis.
379 Sicut enim summos montes silvasque ferasque
380 ad numeros Orphei prosiluisse ferunt.
381 Sic aliquem salibus dictisque jocisque facetum,
382 qui videt omnis amat, diligit, atque fovet.
383 Verum alios qui sunt rigidis de cautibus orti,
384 quos genuit dura Parthica Tigris humo.
385 Nullus amat, nec amare potest, sed quilibet odit :
386 oderunt juvenes, odit et ipse Deus.
387 Gratae illis tenebrae, gaudent soli esse, nec umquam
388 natura ad placidos flectitur illa jocos.
389 Dum studium gravitatis amant, modo vana sequuntur,
390 stultitiamque suam sub gravitate tegunt.
391 Nam tamen hic gravitas a me reprehensa putatur,
392 illa suum in rebus debet habere locum.
393 Hos reprehendo quibus gravitas morosa probatur,
394 ac ceu digna coli Stoica vita placet.
395 Est modus, hunc gravitas praescripta lege sequatur,
396 est modus, ingenuis convenit illa jocos.
397 Haec pete cuncta suis ex fontibus, ordine certo,
398 haec docet et monstrat pagina nostra prior.
399 Quid moror in parvis ? Jocus est sapientia magna,
400 et jocus interdum plus gravitate valet.
401 Haec exempla probant, quae sunt certissima signa,
402 Musa etiam exemplum commemorare jubet.
403 Seditio Ausonia quondam nova in urbe coorta est,
404 atque novus populum traxit ad arma furor.
405 Nullius eloquio praeceps commota ruebat,
406 pro laribus propriis turba parata mori.
407 Non aliter quam si consuetis sedibus actae
408 hostibus a fucis commoveantur apes,
409 per diversa ruit loca concita turba volantum,
410 misceturque uno conglomerata loco.
411 Irruit in medios, placido spectabilis ore
412 orator canis eloquioque potens,
413 et cupiens populi verbis sedare furorem.

414 Res nova, quod dicam, res nova dixit erit.
415 Atque ita cum populum clamanti voce vocasset,
416 impavidus coepit talia verba loqui.
417 Omnibus (ut fama est) amissis viribus olim
418 aegrotus longo tempore venter erat.
419 Membra laboranti morbis non aequa sodali
420 pesque manusque illi dura negabat opem.
421 Ille igitur magis infelix languescere coepit
422 atque mala in longas convaluere moras.
423 Impia senserunt tandem, sibi membra parari
424 exitium, ac humeris damna ferenda suis.
425 Ergo, malum ex aequa, meliores, parte ferendum
426 et cum ventre suo jam statuere mori.
427 Paenituit socium se deseruisse, sed istud
428 officii pensant sedulitate sui.
429 Sic tandem misero vires et robora ventri,
430 et rediit membris qui fuit ante vigor.
431 Quod nisi nunc etiam nobis qui bella paratis,
432 istud ad exemplum damna cavere placet,
433 alter et alterius, ceu venter et invida membrae
434 dissidio moto, destituatur ope.
435 Membrorum exemplo, res certa, peribitis omnes
436 quae venit, haec cunctis poena luenda venit.
437 Talibus obstupuit populus, mentemque recepit
438 et tota exstinctus desiit urbe furor.
439 Quod gravitas, quod non potuit facundia dives
440 quod nullae vires, hoc potuere joci.
441 I nunc dic artem nusquam prodesse jocandi
442 i nunc dic minimum laudis habere sales.
443 Nec tamen hoc uno cupio mea verba probare
444 exemplo, historiae milia multa dabunt.
445 Tractarunt juvenes convivia laeta Tarenti
446 quos tum cena domo junxerat una duos
447 incaluere mero, nec eorum cauta loquendo,
448 sed nimis in Pyrrhum libera lingua fuit.
449 Ergo ubi salvari mala causa et crimine digna
450 nec posset verbis res manifesta tegi.
451 Supplicium capitis miseros post facta manebat,
452 dictorumque gravis poena luenda fuit.
453 Cumque rogarentur quae dicti causa fuisset
454 respondens lepidis vocibus alter, ait
455 quod nisi deficiens laticem lagoena negasset
456 regem occisurus, si licuisset, eram.
457 Talibus evasit poenas, et uterque jocando
458 praecavit capiti damna futura suo.
459 Quid moror exemplis ? Jocus est recreatio vitae.
460 Ille dat auctori commoda multa suo.
461 Ille fugat curas, tristisque e corde dolores,
462 et recreat miris pectora fessa modis.
463 Ille alios aliis placans conjungit amicos,
464 ille hominum mores non sinit esse ferus.
465 Hoc tibi multorum bene conciliare favorem,
466 hoc poteris multos demeruisse tibi.
467 Cum vel apud notos, et cum praesente loqueris,
468 vel mittes digitis scripta notata tuis.
469 Nam sicut Venerem magnetica gemma figurans,

470 quaelibet ad sese ferrea frusta trahit.
471 Sic rapit inque suum multus vi cogit amorem
472 cujus sunt lepidis scripta referta jocis.
473 Quis non semper amat, quem se non cogit amare
474 et cui non dulcis Tullius ore placet ?
475 Tullius eloquii pater et lux aurea Romae,
476 cujus ab ore potens lingua latina fluit.
477 Nota cano, cui non scriptis jucundus Erasmus,
478 quem non blanditiis attrahit ille suis ?
479 Non quibus est blandus Gnatho, quibus utitur idem,
480 dum lingua fucum decipiente facit.
481 Sed valet ars in iis suavi ratione jocandi,
482 atque Tibullaeo qui venit ore lepos.
483 Ergo isti valeant, et mente carere putentur,
484 qui dicunt pretii nullius esse sales.
485 Te non tantorum vestigia pressa virorum
486 fac numquam pudeat paeniteatve sequi.
487 Et cur paeniteat ? Quando incivilis habetur
488 qui numquam didicit verba jocosa loqui.
489 Cur pudeat ? Quoniam summum praecepta jocandi
490 scribere philosophum non puduisse liquet.
491 Cur pudeat ? Summi Ciceronis scripta supersunt
492 quorum iudicio dicta faceta valent.
493 Quod vel Aristotelem decuit, linguaeque parentem,
494 te quoque quisquis eris posse decere puta.
495 Nec nuper collecta putes, inventaque nuper,
496 invide, de salibus quae tibi cumque dedi.
497 Nam scio proscindet nostros mala turba libellos
498 forte aliquis nostrum sic reprehendet opus.
499 Quid rem fortuitam sub leges cogere temptas ?
500 Nan profecturum quod facis, omne facis.
501 Nam quod ab artificis naturae munere pendet,
502 et quae sponte valent, arte valere putas ?
503 Desine vana loqui livor, quid inania culpas ?
504 Non stant iudicio carmina nostra tuo.
505 Si licet, auctores suavis reprehende leporis
506 qui lepidis primos erudiere jocis.
507 Si tamen (ut numquam potuisti), garrule Mome,
508 non potes hic mores dissimulare tuos.
509 Perge loqui, modo displiceam tibi, nulla morabor,
510 magna mihi laus est displicuisse tibi.
511 Hactenus invidiae respondimus, illa tacendo
512 contemnenda mihi, vel superanda fuit.
513 Sed tamen est licitum teneram defendere Musam,
514 da veniam, lector, versibus oro meis.
515 Et placeat studium, placeat propensa voluntas,
516 quam pia turba probat, quam probat ipse Deus.
517 Nunc mea contingant, optato litore portum
518 laxat ain multos candida vela dies.